

ASO LUA, 26 ME 2020

Na tauaofia le Fonotaga a le Palemene i le itula e 9:07 i le taeao e tusa ai ma Polokalame o Fonotaga a le Palemene 2020/2021.

Tatalo.

FOFOGA FETALAI: Ou te faasilasila atu ua toe amatalia nei Taulumaga ma Galuega a le Fono Aoaofa Fautulafono.

Ua malo le lagi e mama, ua faamalo le soifua manuia. Avea ia le leo faatauvaa o le Nofoa e molimoli atu ai le faamalo ma le agaga faafetai ma faatalofa atu foi i lau Afioga i le Palemia o le Taitai o le Maota, lau Afioga i le Sui Palemia ma le Kapeneta faapea foi Minisita Lagolago aemaise foi o sui usufono mamalu o le Palemene.

E faatalofa atu foi i Ofisa Sili o Pulega o Matagaluega ma Faalapotopotoga a le Malo o lo o tatou faatasi i lenei taeao i le Fonousu a Samoa.

MALELEGA MAI I LE AO O LE MALO

Na fofogaina e le Fofoga Fetalai le Malelega Mai Lana Afioga Mamalu, O Le Ao o le Malo.

TUSI mo:

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa, ua ou tuuina atu nei le maliega i le Fono Aoaofa Fautulafono na te iloiloaina ai Tulafono Tau Faaofi ua faaalua iinei:

1. Tulafono Tau Faaofi o le Faatatauina o Tupe Faaopopo (Nu.3) 2019/2020.
2. Tulafono Tau Faaofi o le Faatatauina o Tupe 2020/2021.

TUUINA ATU i lou nei Lima i lenei aso 25 o Me 2020.

Sainia: Tuimalealiifano Vaaletoa Sualauvi II
O LE AO O LE MALO

ISI FAASILASILAGA A LE FOFOGA FETALAI

POLOAIGA MO FAALAVELAVE TUTUPU FAAFUASEI

FOFOGA FETALAI: E faasilasila atu i le mamalu o le Palemene ua ou taulimaina nei Teuteuga o Poloaiga mo Faalavelave Tutupu Faafuasei mo le Koviti-19, e pei ona faamaonia e Lana Afioga, O Le Ao o le Malo, Tuimalealiifano Vaaletoa Sualauvi II, i luga o le Fautuaga a le Kapeneta e pei ona taua i lalo:

1. Teuteuga o le Poloaiga o Faalavelave Tutupu Faafuasei, aso 30 Aperila 2020, amata faamamaluina i le aso 3 Me 2020;
2. Teuteuga o le Poloaiga o Faalavelave Tutupu Faafuasei aso 13 Me 2020, amata faamamaluina i le aso 14 Me 2020;
3. Teuteuga o le Poloaiga o Faalavelave Tutupu Faafuasei aso 14 Me, amata faamamaluina i le aso 15 Me 2020.

O lo o tumau pea le faamamaluina o nei Poloaiga seia toe i ai se isi Faaaliga i le lumanai, mo le silafia e le Palemene aemaise foi le faafofoga tapuai mai a Samoa.

TUUINA ATU O PEPA

Na tolaulauina e le Failautusi i le Fono Aoa le faasologa o Pepa e tusa ai ma T.T.49(2).

1. P.P.2020/2021 Nu.2, Lipoti Faaletausaga a le Auaunaga a le Falepuipui ma le Toefuataiga Tausaga Faaletupe 2018/2019.
2. P.P.2020/2021 Nu.10, Lipoti Faaletausaga a le Matagaluega o Faatoaga ma Faiga Faiva Tausaga Faaletupe 2018/2019.
3. P.P.2020/2021 Nu.11, Lipoti Faaletausaga a le Ofisa o le Failautusi o le Fono Aoa Faitulafono Tausaga Faaletupe 2017/2018 & 2018/2019.

TUUINA ATU O LIPOTI A KOMITI FAA-PALEMENE

Na tolaulauina e le Failautusi le faasologa o Lipoti a Komiti Faa-Palemene e tusa ai ma T.T.52(5).

1. P.P.2020/2021 Nu.4, Lipoti a le Komiti o le Vaega tau le Tamaoaiga i le Tulafono Tau Faaofi o le Vaega o Faatoaga ma Faiga Faiva 2019.
2. P.P.2020/2021 Nu.6, Lipoti a le Komiti o Tupe Maua ma Tupe Totogi i le P.P.2019/2020 Nu.168, Lipoti o Faamatalaga o Tupe a le Malo mo le Tausaga Faaletupe 2018/2019.
3. P.P.2020/2021 Nu.7, Lipoti a le Komiti a le Vaega tau le Tamaoaiga i le P.P.2019/2020 Nu.159, Lipoti Faaletausaga a le Kamupani Vaalele a le Polenisia Tausaga Faaletupe 2018/2019.
4. P.P.2020/2021 Nu.8, Lipoti a le Komiti o le Vaega tau le Tamaoaiga i le P.P.2019/2020 Nu.163, Lipoti Faaletausaga a le Faalapotopotoga o Eleele o Samoa 2018/2019.
5. P.P.2020/2021 Nu.9, Lipoti a le Komiti o le Vaega tau le Tamaoaiga i le P.P.2019/2020 Nu.166, Lipoti Faaletausaga a le Ofisa o Fuainumera Faamauina Tausaga Faaletupe 2018/2019.

LAFO A LE TAITAI O LE MAOTA E TUSA AI MA LE TULAFONO TUMAU 47

FOFOGA FETALAI: Ma lou faaaloalo ou te tapa lau Afioga i le Taitai o le Maota.

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI (Palemia): Lau Afioga i le Fofoga Fetalai, tatou te auai faatasi i lenei taeao fou i le viiga ma le faafetai i le Atua pei ona e saunia le tatalo ona o le taitaiga mai o le soifua o le Maota nei i Afioga i sui usufono mamalu o le Palemene aua le tatou Fonousu pei ona atofa ai i le taeao nei.

Lau Afioga i le Fofoga Fetalai ou te faatu le lafo, *Ina ia tusa ai ma le Tulafono Tumaui 47, ia faaauau Galuega Tuua a le Fono Aoa mai le Tauaofiaga 2019/2020 i le Tauaofiaga lenei 2020/2021 e pei ona tusia i le Pepa Faaopopo o Galuega 2020/2021 Nu.1.*

Faaluaina e le Minisita mo Pisinisi, Alamanuia ma Leipa ma le Minisita mo Tina ma Tamaitai, Atinae o Nuua ma Afioga ma Agafesootai.

Na faamaonia le lafo.

**TULAFONO TAU FAAOFI O LE FAATATAUINA O TUPE
FAAOPOOPO (NU.3) 2019/2020 – faitauga muamua**

FOFOGA FETALAI: Ou te tapa lau Afioga i le Minisita o Tupe.

Afioga SILI EPA TUIOTI (Minisita o Tupe): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu.3) 2019/2020 i lona faitauga muamua.*

Faaluaina e le Minisita mo Aoga, Taaloga ma Aganuu ma le Minisita mo Galuega, Felauaiga ma Atinae Eseese.

Na faamaonia le lafo ma faitauina le Tulafono Tau Faaofi o le Faatatauina o Tupe Faaopoopo (Nu.3) 2019/2020 i lona faitauga muamua.

**TALA FAATATAU O TUPE FAAOPOOPO (NU.3) 2019/2020
– faataatia i luga o le Laulau a Fono**

FOFOGA FETALAI: Ma lou faaaloalo ou te tapa lau Afioga i le Minisita o Tupe.

Na faataatia i luga o le Laulau a Fono e le Afioga Hon Sili Epa Tuioti le Tala Faatatau o Tupe Faaopoopo (Nu.3) 2019/2020.

**TULAFONO TAU FAAOFI O LE FAATATAUINA O TUPE
FAAOPOOPO (NU.3) 2019/2020 – lafo mo le faitauga faalua**

FOFOGA FETALAI: Ou te tapa lau Afioga i le Minisita o Tupe e tulai mai.

Afioga Hon SILI EPA TUIOTI: Lau Afioga i le Fofoga Fetalai ou te faatu le lafo, *Ina ia faitauina le Tulafono Tau Faaofi o le Faatatauina o Tupe Faaopoopo (Nu.3) 2019/2020 i lona faitauga faalua, ma o le Faamatalaga o Tupe Faaopoopo o le a aofia i le Lauga o le Tala Autu o le Tupe 2020/2021.*

Faaluaina e le Minisita mo Aoga, Taaloga ma Aganuu ma le Minisita mo Tupe Maua.

FOFOGA FETALAI: Malo faafetai. E tusa ai ma Tulafono Tumau 132, o le a tolopo felafolafoaiga i le Tulafono Tau Faaofi o le Faatatauina o Tupe Faaopoopo (Nu.3) 2019/2020 e le itiiti ifo i le 14 aso a o tuuina atu le Tala Faatatau o Tupe Faaopoopo (Nu.3) 2019/2020 mo le iloiloga a le Komiti o Tupe Maua ma Tupe Totogi ma toe lipoti mai i le Fono Aoao.

**TULAFONO TAU FAAOFI O LE FAATATAUINA O TUPE
2020/2021 – faitauga muamua**

FOFOGA FETALAI: Ou te tapa ma le faaaloalo lau Afioga i le Minisita o Tupe.

Afioga Hon SILI EPA TUIOTI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe 2020/2021 i lona faitauga muamua.*

Faaluaina e le Minisita mo Aoga, Taaloga ma Aganuu ma le Minisita mo Tupe Maua.

Na faamaonia le lafo ma faitauina le Tulafono Tau Faaofi o le Faatatauina o Tupe 2020/2021 i lona faitauga muamua.

**TALA FAATATAU AUTU O TUPE 2020/2021
– faataatia i luga o le Laulau a Fono**

FOFOGA FETALAI: Ou te tapa lau Afioga i le Minisita o Tupe.

Na faataatia i luga o le Laulau a Fono e le Afioga Hon Sili Epa Tuioti le Tala Faatatau Autu o Tupe 2020/2021.

**TULAFONO TAU FAAOFI O LE FAATATAUINA O TUPE
2020/2021 – lafo mo le faitauga faalua**

FOFOGA FETALAI: Ia, se i toe tulai mai lau Afioga i le Minisita o Tupe faamolemole.

Afioga Hon SILI EPA TUIOTI: Lau Afioga i le Fofoga Fetalai ou te faatu le lafo, *Ina ia faitauina le Tulafono Tau Faaofi o le Faatatauina o Tupe 2020/2021 i lona faitauga faalua.*

Faaluaina e le Minisita mo Aoga, Taaloga ma Aganuu ma le Minisita mo Tupe Maua.

FOFOGA FETALAI: Ia, ua ou manatu o le avanoa lenei mo le saunoaga a lau Afioga i le Minisita o Tupe. Tulai mai.

SAUNOAGA O LE TALA FA'ATATAU AUTŪ O LE TUPE
2019/2020

“Tatou Lalagaina Faatasi se Lumanai Manuia ma Mausali mo Samoa”

Afioga Hon SILI EPA TUIOTI: Lau Afioga i le Fofoga Fetalai, e tusa ai ma le Tulafono Tumau 131, e ia te au le ava tele ma le faaaloalo e tatau ai, e fai ai au ma sui o le Malo ou te tuuina atu se ootoga o le Tala Faatatau Autu o le Tupe mo le tausaga faale-tupe 2020/2021 i le laulauafono a le Palemene o Samoa.

I. FAAVAE O LE TALA O LE TUPE

Lau Afioga i le Fofoga Fetalai, ua sina nei le galu, ua iite fanua alalo, aua ua tu mai ioa le lagaali a tama faiga, lenei ua tatou taunuu i le tauafiafi o le taulaumea. Ua faataumua'ava foi le folauga a Samoa i lenei 5 tausaga o le Paeaiga lona XVI a le Palemene o Samoa.

Lau Afioga i le Fofoga Fetalai, ua i luma o Le Atua le tatou viiga ma le faafetai i le tatalo na e saunia i lenei taeao e faafetaia ai lona alofa i lona taitaiina saogalemu mai o le tatou folauga i lenei Paeaiga ua tau faaiuiu.

Ou te faatalofa atu ai i lau Afioga i le Fofoga Fetalai ma le mamalu o sui usufono mamalu o le Palemene. O paia e faasino i le tapuaiga i Le Ao o le Malo, Sui o le Fono a Sui Tofia, ma le Faamasino Sili. O paia lava e faasino i Aiga ma a latou Tama, Tama ma o latou Aiga, Le Usoga a Tumua ma Puleono i Salafai, tainane Auauna a le Atua o lo o faanono manū aua se manuia o Samoa ma ona upufai.

Lau Afioga i le Fofoga Fetalai, o lenei Tala o le Tupe ua tapenaina a o lūtia Samoa ma le lalolagi ona o le pepesi faaafi o le faamai oti o le Koviti-19 ua aafia ai le tele o atunuu o le lalolagi ma ma'imau ai le soifua o le toatele. E ui ina malutia ma saogalemu Samoa mai lenei fa'amai, e lē tatau lava ona tatou faatamala ona e tatou te momoe ma manū e lē fati, ae sau pea mala e atiae ma e tumau pea ona faamalosia a tatou tapu ma vavao ina ia taofia le ono oo mai o lenei mala i o tatou laufanua. O nei fuafuaga uma e le faigofie ona faatino ae o lo o ave iai le faamuamua a le Malo ina ia malu puipuia Samoa ma ona tagata i taimi uma.

Lau Afioga i le Fofoga Fetalai, o se avanoa lelei lenei ou te faia ai se upu Faafetai a lo tatou Malo i ana paaga uma o lo o agalelei mai ia Samoa e ala i fesoasoani tupe faameaalofa, faapea masini, meafaigaluega ma vailaau mo togafitiga, faasoa mai o le tomai faapitoa mo le aufaigaluega a lo tatou Malo, faigapaaga ma le fesoasoani a le vaega o pisinisi tumaoti, aemaise o talosaga molia mo se Samoa Saogalemu. Malo, Faafetai tele lava.

O le faafetai faapitoa e tuuina atu i le aufaigaluega a le Malo, o i latou o mua'au a Samoa mo le puipuiga mai osofaiga e lamatia ai lo tatou soifua maloloina lelei. O le Komiti lea e Faapitoa mo Faalavelave Tutupu Faafuase'i (NEOC) o lo o gafa ma le puipuiga o Samoa mai le faamai o le Koviti-19 e pei ona galulue ai i Maota Gasegase eseese i totonu o le atunuu faapea le Malae Vaalele Faavaomalo i Faleolo ma le Uafu i Matautu o lo o to'ai taunuu mai ai tatou tagatanuu ua toe foi mai i le atunuu ma faaulufale mai ai oloa e moomia mo aso uma faapea vailaau ma masini mo le puipuiga. Faamalo le faatoatoa, Faafetai tautua mo Samoa.

Lau Afioga i le Fofoga Fetalai, e lagona pea le mafanafana ma le loto tele pe a toe tepa i tua i la tatou folauga o lenei 5 tausaga o le paeaiga o lo o faagasolo nei i le tele o luitau sa feagai ma i tatou, ae sa mafai ona tatou tali vave atu i ai ona o le lelei tapena ma le malosi faatulagaina o Faiga Faavae tau tupe o lo o limataitaina ai tulaga uma tau tupe a lo tatou Malo.

O le tausaga e 2016/2017 sa matauina ai le pa'ū mauualalo o le fa'atupula'ia o le tamaoaiga i le 1% i le tuana'i ai o tausaga sa siitia ai le tamaoaiga, sosoo ai ma le faaitiitia o le tamaoaiga i le 2.2% i le tausaga 2017/2018. O nei suiga ogaoga sa tula'i mai ina ua tapunia le kamupani tele o le Yazaki Samoa i le 2017; faaletonu le atinae tau vaa fagota ma faiga faiva ona o suiga o maketi mo fefaatauaiga i le 2017, faatasi ai ma suiga o le tau lea na a'afia ai Samoa i le Afa o Gita ma faaleagaina ai se vaega tele o Apia i matagi ma lologa malolosi i le 2018.

I le tausaga faaletupe 2018/2019, e 3.5% sa siitia mauualuga ai lo tatou tamaoaiga. O tapenaga a Samoa mo Taaloga o le Pasefika lea na talimalo ai i le tausaga na tea nei 2019 sa fesoasoani tele i le unaia malosi o tulaga tau pisinisi i totonu o le atunuu faatasi ai ma isi fonotaga tetele sa talimalo ai Samoa i lea vaiata.

O le amataga o le tausaga nei ia Fepuari 2020 a o le i aafia le lalolagi ma le Pasefika i le Korona Vairasi, sa faatino ai suesuega faale-tausaga o le tamaoaiga o Samoa e le Faalapotopotoga Faaputugatupe o le Lalolagi - International Monetary Fund (IMF). O se sailiiliga e faatino i taiala maumaututu fava o malo ma e le i faapaole ona fai. I le maea ai o lenei suesuega, sa faailoa mai e le IMF lo latou talitonuga malosi e tataua ona ausia e Samoa se siitaga e 3% le mauualuga e fua i le tamaoaiga mo le tausaga o lo o faagasolo nei 2019/2020. E Faavae le latou mau i le lelei faafoeina o le tamaoaiga e tusa o faiga faavae o lo o limataitaina ai galuega a lo tatou Malo. O lo o lagolagoina foi i nei sueusega le taua o le unaia pea o atinae e

lagolagoina ai le tamaoiga a o feagai ai ma fesouaina o aso uma. O le ausia e le tamaoiga o nei matatia a o feagai le atunuu ma nisi o luitau, o se pine faamau o lo o mausali lo tatou tamaoiga ma e toe faafoisia i se taimi vave i le tulaga malosia sa i ai muamua le atunuu.

Lau Afioga i le Fofoga Fetalai, ua 3 nei masina talu ona aafia lo tatou itulagi i le faamai oti ua iai nei. O le mea moni, e le mautinoa le umi e saili fofu ai e ala i vailaau o lo o susesueina e Malo tetele i le taimi nei. Ua faitau miliona tagata ua leai ni galuega, tele foi kamupani ma pisinisi fava-o-malo o lo o unaia tamaoiga o atunuu malolosi ua tapunia ma atili pagatia ai le tamaoiga o le lalolagi lea ua fuafuaina e le i lalo ifo o le 5% o le a faaitiitia ai i le tausaga nei. Mo Samoa lava ia, ua fuafuaina o le a faaitiitia lo tatou tamaoiga i le 3.3% i lena tausaga 2019/2020.

O lena Tala Faatatau Autu o le Tupe, ua tuu faatasia ma le vaaiga taulai i vaega nei:

- 1) Ia tapena ma tuuina atu se fesoasoani faamama avega a le Malo mo le atunuu atoa o lo o a'afia i le taimi nei e ala i le Vaega 2 o lana faamama avega (Stimulus Package Phase 2);
- 2) Faaauau ona ave le faamuamua i vaega maoti o le Soifua Maloloina ma Aoaoga;
- 3) Faatino ma faaaauau atinae ma polokalame tetele a le Malo e fesoasoani ai i galuega moomia ma lagolagoina ai le tamaoiga;
- 4) Ia gafataulimaina e le malosia tau tupe a le Malo lana tapenaga o le Tala o le Tupe Autu mo le Tausaga 2020/2021; ma le
- 5) Ia tausisia taiala ma faiga faavae lelei o lo o limataitaina ai tulaga tau Tupe a le Malo.

Lau Afioga i le Fofoga Fetalai, o Samoa o se tasi o atunuu ua maua luga lona faatulagaina i upufai aemaise lona tamaoiga i le lio o atunuu laiti o le Pasefika.

E talafeagai ona ou faailoaina nisi o matati'a ua mafai ona ausia e le Faigamalo o le HRPP mai le amataga o lena Paeaiga i le 2016 e oo mai i le taimi nei e aafia ai vaega nei:

1. Siitia o avanoa faigaluega i lalo o le Polokalame o le Recognised Seasonal Employer Scheme lea ua manuia ai le toatele i galuega faavaitaimi i Niu Sila faatasi ai ma le Pacific Labour Scheme a Ausetalia;
2. Tatalaina o laina o fesootaiga ua taua o le Submarine Cable Project ina ia siitia ai tulaga tau fesootaiga faatekonolosi ma taugofie ai atinae mo fesootaiga o aso uma faatasi ai ma le toe faaleleia o pou faasalalau ma masini mo le Leitio 2AP mo ana auaunaga i le atunuu;

3. Usuia i Samoa nei o Taaloga ma Fonotaga Faava-o-malo ua siitia ai lo tatou tulaga o se atunuu e mafai ona talimalo i so o se faatasiga faava-o-malo ma lagolagoina ai lo tatou tamaoiga i le vaega maoti o Turisi ma Pisinisi;
4. Fausiaina o le Malae Vaalele Faava-o-malo Fou i Faleolo e lagolagoina ai femalagaiga faava o malo faapea le faateleina o le Uafu i Matautu mo le auina atu o oloa mo maketi i atunuu i fafo;
5. Faaleleia auaunaga tau aoaoga faapea faleaoga mo nuu ma afioaga faatasi ai ma le siitia maualuga o le fesoasoani tuusao (One Government Grant) i aoga uma e aofia ai aoga amata (Early Childhood Education), lea ua faamoemoe e faaaluina ai le vaegatupe e \$18 miliona tala i le tausaga, ma e amata atu ia Iulai o le tausaga nei;
6. Siitia auaunaga tau soifua maloloina i totonu o le taulaga faapea nuu ma alaalfaga i tua e pei ona faaleleia ai maota gasegase, faaauauina ai auaunaga a le afaigaluega i nuu ma alaalfaga i tua, aemaise o le faatotogaina o nei nofoaga i masini ma vailaau mo togafitiga o le mamalu o le atunuu;
7. Fausiaina o auala tetele i totonu o le atunuu i fausaga malolosi faaonaponei e mafai ona tali atu i suiga o le tau; fausiaina o ala simā ma auala kolosi mo le faafaigofieina ma le saogalemu o le atunuu femalagai e aofia ai galuega fou i Vaisigano i Apia; Maliolio i Samalaeulu faapea ma Lotosamasoni; aemaise auala galue e lagolagoina ai atinae o nuu ma afioaga taitasi;
8. Le faaauauina o le faaleleia o auala i le itu i Sisifo o Upolu agai atu i Faleolo (West Coast Road);
9. Fausiaina o le Falepuipui Fou i Tanumalala aua le saogalemu o le atunuu faapea le ola toefuataina o i latou o lo o tuli faasalaga i lea nofoaga;
10. Fausiaina o le Maota Fono Faitulafono Fou aua le fono usu a Samoa;
11. Faasafuaina atu o atinae o le suavai ma le eletise ina ia faasopolia Samoa atoa i nei auaunaga taua a lo tatou Malo;
12. Faatosina mai o Kamupani tetele, e aofia ai Faletalimalo Fou mai fafo ma Kamupani vaa fagota tetele e faatuina a latou pisinisi i Samoa nei e unaia ai le atinae o Turisi faapea faatoaga ma faigafaiva ma maua ai avanoa faigaluega mo le toatele;
13. Lagolagoina o atinae tau turisi e auala atu i polokalame ma atinae faaauau i le Taulaga i Apia faapea alaalfaga o lo o faatinoina ai faapea le faatuina o le Kamupani o le Samoa Airways aua le tautuaina o maketi i Niu Sila ma Ausetalia;

14. Faaauauina o Polokalame o Faatoaga (SAFPROM/ Agribusiness) o lo o lagolagoina ai atinae tau faatoaga ma faigafaiva mo le fofoga taumafa o le atunuu faapea a tatou oloa auina atu i maketi i fafo;

II. VAAIGA TAULAI I LE LUMANAI

Lau Afioga i le Fofoga Fetalai, ua manino i tapenaga o lenei Tala Faatatau Autu o le Tupe, le tulaga faaletonu ua aafia ai lo tatou tamaoaiga ma e ogatasi lava ma fuafuaga mamao o le 12 o lumanai nei mo le tele o atunuu e aofia ai atunuu e malolosi tamaoaiga lea ua vaaia le pau maualalo o le tamaoaiga, vāea o le toatele o le aufaigaluega, aemaise o le ogaoga o aafiaga i vaega maoti sa faalagolago iai le atunuu e pei o le vaega o Turisi ma le auina atu o oloa i atunuu mamao mo fefaatauaiga.

O le va'aiga taulai mo Samoa i le tausaga faaletupe fou, e ono faaiti'itia le tamaoaiga i le 2.0% ona o le tulaga le mautonu o lo o i ai Samoa ma le lalolagi i lenei vaitau. E leai se tasi e na te mafai ona valoia le aso ma le taimi e maua ai se fofo o le faamai o le Koviti-19 lea o lo o faamoemoe ai le toe tatalaina o a tatou malae vaalele mo femalagaiga masani faava-o-malo o lo o faamoemoe ai atinae o turisi faapea fefaatauaiga masani ua aafia tele ona o le tulaga pagatia ua i ai tamaoaiga o atunuu o lo o tatou faipaaga.

Lau Afioga i le Fofoga Fetalai, e ao ona ou faailoa atu le agaga maualuga i le Faigamalo ina ia faaauau lana faamāmā avega i le atunuu a o feagai ai ma lu'itau tetele o le soifuaga. O le vaega 2 o lea fesoasoani poo le Stimulus Package o le a faasopolia ai Samoa atoa e tusa o taumafaiga i vaega taitasi o lo o ave i ai le faamamafa. O le mea ua mautinoa, o le a fesoasoani lenei fuafuaga e toe faataamilo le tamaoaiga i lenei vaitau a o moomia ai gaioiga faapenei i so o se Malo e tali atu i e ua matuai mafatia lava.

O lo o faaauau foi fesootaiga a le Matagaluega o Tupe ma paaga uma a le Malo mo le faaauauina lea o fesoasoani faameaalofa ua maea pasiaina mo le isi lima tausaga o lumanai ina ia maua ai pea galuega mo fanau a Samoa aemaise faamanuiaga tuusao mo le tamaoaiga pe a amata faagasolo nei atinae ma polokalame tetele o lo o taulamua ai le Malo.

III. TAIALA O LE TALA O LE TUPE

Lau Afioga i le Fofoga Fetalai, e i ai le talitonuga e mafai lava ona toe faafoisia vave lo tatou tamaoaiga i se tulaga maualuga pe afai tatou te galulue punoua'i ma faatino a tatou fuafuaga uma ua maea faataoto mo le lumanai. O le ala lea ua faaulutalaina ai le sini autu o lenei Tala o le Tupe e faapea ***“Tatou Lalagaina Faatasi se Lumanai Manuia ma Mausali mo Samoa”***. O lo o atagia i le sini autu o lenei Tala o le Tupe le feau taua o le Sa o Samoa

e Fautele ma o atinae ma fuafuaga uma a le Faigamalo lenei, o lo o tapena mo le manuia o le atunuu lautele.

Lau Afioga i le Fofoga Fetalai, e tomua atu tapenaga a le Malo mo le tausaga faaletupe fou i le Vaega Lua o le Fesoasoani Faamāmā avega a le Malo mo le Koviti-19 ma e auiliiliina atu i vaega taua nei:

1. *Tului mo Saofaga a le NPF;*

O le a faamatuu ma tufaina atu le tului mo le au faisaofoaga a le NPF i le masina o Iulai 2020 ma e \$35 miliona tala se vaegatupe o le a faaluina ai.

2. *Penisione faaopoopo e \$100 mo le masina o Iulai;*

O le a tuuina atu se penisione faapitoa e \$100 tala mo tinā ma tamā matutua o le atunuu mo le masina o Iulai e faaopoopo i le penisione masani o lea foi o le siitia mai le \$145 tala i le \$160 tala i masina taitasi. O lona uiga la mo le penisione o le a maua i le masina o Iulai, ua \$160 tala faaopoopo i ai ma le \$100 o le fesoasoani i le penisione faapitoa lea, ua \$260 tala ai le penisione mo Iulai a o isi masina e faasolo atu e \$160 tala i le masina, o le siitaga mai le \$145 tala o lo o i ai nei.

3. *\$50 tala mo tagatanuu Samoa uma a o faasolo le tusigaigoa 2020 ma le lesitala faapitoa mo le pepa o faamaumauga;*

O le a faatino faatasi le tusigaigoa o le tausaga nei 2020 ma le lesitala faapitoa mo Pepa o Faamaumauga po o le (National ID) ma o le a faasafua atu le \$50 tala mo tagatanuu Samoa uma mo lea faamoemoe.

4. *Polokalame Faatoaga e Unaia ai Atinae o niu, koko, talo ma fualaaauaina;*

O lenei polokalame o le a faatino e le Malo i lalo o le Matagaluega o Faatoaga ma ana paaga mo le toe fafaguina o atinae o le Niu, Koko, Talo, ma Fualaaauaina e fa'aaogaina ai tagata ua leai ni galuega e latou te faato'aina fanua i ni tulaga faapaaga ma le Malo ma saga fa'amausaliina ai foi le lava o fua o fa'aeleeleaga aua le fofoga taumafa o le atunuu.

5. *Fesoasoani tau tupe mo ē ua aafia galuega ona o le Koviti-19;*

O le a galulue faatasi le Matagaluega o Tupe ma le Fa'alapotopotoga o Pisinisi Tumaoti i Samoa (Samoa Chamber of Commerce) e faamautu ma totogiina atu fesoasoani tau seleni i le afaigaluega ua vāea mai i galuega faapea i latou ua faaitiitia taimi

faigaluega ona o le aafiaga o le Koviti 19 i pisinisi tumaoti sa faigaluega ai.

6. *Faaopoopo masina o le lē totogiina o lisi i maketi a le Faalapotopotoga o Fanua a Samoa (Samoa Land Corporation) ma le Faalapotopotoga o Tau'i mo Faalavelave Faafuasei (Accident Compensation Corporation);*

O le a faaauauina le faapafala o le totogi o lisi mo poloka o maketi i Savalalo, Fugalei, Vaitele ma Salelologa mo i latou o lo o faaogaina nei maketi seia maea le Masina o Aukuso o le tausaga nei.

7. *Faatinoina aoaoga faapitoa mo le Vaega Maoti o le Turisi po o le Tourism Industry;*

O le a galulue fa'atasi le Malo e tauala atu i le Pulega o Tagata Tafafao Maimoa mai Fafu ma le Aoga o Matātā Eeseese a Ausetalia (APTC) faapea ma le Iunivesite Aoa o Samoa (NUS) i le fa'atinoina lea o ni aoaoga faapitoa e siitia ai le tomai ma auunaga o e o lo o faafaigaluegaina i auunaga tau turisi. O lenei polokalame o le a faapito lea i ē ua faamalolo mai i faletalimalo po o fale aiga ma isi auunaga tau turisi ona o le Koviti-19. O le a tuuina atu iai alauni fa'apitoa mo nei tagata mo le auai ai i nei aoaoga faapitoa.

8. *Fesoasoani mo le Talofa Airways;*

O le a faamatuu atu se fesoasoani i le Talofa Airways e tusa o le talosaga sa tuuina mai mo se faamamaavega i lenei vaitau. Mo le silafia, o le isi lea avefua a le atunuu o lo o lagolago i le Samoa Airways i femalagaaiga a tagata o le tatou atunuu ma le sao tele i tupe maua mai tagata asiasi mai fafo.

9. *Fesoasoani mo nisi o pisinisi o lo o faatauina atu oloa tau faatoaga ma faiga faiva i atunuu i fafo;*

O le a faaolaina atu e le Malo le 5% o tupe maua ua lē mafai ona maua e nei pisinisi ona o aafiaga i fefaatauaiga faava-o-malo talu ai le Koviti-19. O lenei fesoasoani e fua i faamaumauga o oloa sa auina atu i fafo i le va o Fepuari ma Iuni 2020.

10. *Fa'amagalo le Totogiina o laisene o vaa fagota mo le au fai faiva;*

O le a lē toe totogiina se vaegatupe mo le faafouina o laisene mo vaa fagota uma o le vaega Class A, B ma le C e amata atu ia Me 2020 e tau ia Tesema 2020. E tatau pea ona faatinoina siaki masani

mo le tuuina atu o le laisene fou ae o le a lē totoigiina se vaegatupe e pei ona masani ai.

11. *O le a tauaveina e le Malo le 2% o tului mo nonogatupe uma a Pisinisi Tumaoti i so o se faletupe faapisinisi (Commercial Banks) i le atunuu mo le 3 masina;*

E pei ona silafia e le mamalu o le Palemene ma le atunuu, o le vaega muamua o le fesoasoani a le Malo lea sa tauaveina ai e le Malo le 2% o tului mo nonogatupe o tagata lautele mo le tolu masina. O lea ua faasafua atu lenei fesoasoani a lo tatou Malo i pisinisi uma e faamamaavega ai i nonogatupe i Faletupe Faapisinisi e 4 i totonu o le atunuu. Lau Afioga i le Fofoga Fetalai, o le faamatuuina atu o lenei fesoasoani faapitoa mo pisinisi, e tuuina atu ai foi ma le lui a le Malo i Faletupe Faapisinisi (Commercial Banks) e 4 o lo o i ai nei ina ia fai foi so latou sao e faatutusa pe sili atu i le fesoasoani lenei a le Malo ua faailoaina atu.

12. *Fesoasoani Faapitoa mo Nonogatupe a le Faletupe o Atinae o Samoa;*

O le a faamatuuina atu se fesoasoani a le Malo i le Faletupe o Atinae o Samoa e faatino ai ana polokalame ma ana paaga mo le unaia o le atinae o pisinisi i totonu o le atunuu, ma e faapitoa i atinae eseese tau faatoaga.

13. *Fesoasoani tau tupe mo Faalapotopotoga uma a le atunuu o lo o faafoeina auaunaga tau soifua manuia mo o tatou tagatanuu;*

O nei vaegatupe e lē gata ina fesoasoani i le faatinoina o a latou auaunaga ae faafetaia ai foi la latou tautua mo Samoa i tausaga ua mavae a o le i litaea ma malolo mai galuega faapea foi i latou e moomia fesoasoani faapitoa. O nei Faalapotopotoga e aofia ai:

- i. Mapuifagalele Home for the Elderly – Little Sisters of the Poor;
- ii. Samoa Victim Support Group;
- iii. Goshen Trust;
- iv. Fa’ataua Le Ola;
- v. Nuanua o le Alofa;
- vi. Loto Taumafai;
- vii. Senese;
- viii. Divine Mercy Moamoa.

E talitonu le Malo o lo o i ai nisi faalapotopotoga o lo o faatinoina foi nei auaunaga taua ma o lo o i ai vaegatupe faaagaga mo nei

faalapotopotoga e le i taua ma o le a galulue le Malo ina ia oo atu iai lenei fesoasoani.

14. *Faamāmāavega mo tului o nonogatupe i lalo o le South Pacific Business Development (SPBD);*

O le a tuuina atu se fesoasoani i le SPBD e tauave ai e le Malo le 2% o tului mo nonogatupe a le mamalu o le atunuu aemaise o tinā ma tamaitai o lo o aofia ai.

15. *Faamalosia o galuega a Komiti Tumama i Nuu ma Afioga uma o le atunuu;*

O se fuafuaga lenei e toe faamalosia ma toe faaolaola ai Komiti Tumama i nuu ma afioga uma o le atunuu e lagolagosua i atinae i alalafaga aemaise le siitia o le tulaga o le soifua maloloina ma aooaga a fanau e pei ona i ai i tausaga ua tuanai. Mo le amatalia o lenei faamoemoe, o le a faamatuu atu e le Malo le \$3,600 i tusitupe mo Komiti Tumama uma o le atunuu ua faamaonia e le Matagaluega o Tina, Tamaitai ma Atinae o Nuu ma Alaalafaga. O lenei vaegatupe e faatupe ai a latou galuega faatino mo le unaia o le soifua maloloina ma le tumama i totonu o nuu ma alaalafaga.

16. *Fesoasoani mo le Siitia o Tulaga Tau Fale mo ē Lima Vaivai;*

O lenei faamoemoe o le a galulue faatasi ai le Malo ma le Faalapotopotoga o le Adventist Disaster Relief Agency (ADRA) mo le iloiloina o e agavaa faapea le faasafuaina atu o lenei polokalame i aiga o lo o matauina le tulaga lē saogalemu o nofoaga o lo o faamautu ai faatasi ma le ono aafia gofie i faamai pipisi, e pei ona maitauina i le vaitau o le Misela i le tausaga na tea nei.

17. *Fa'alapotopotoga o Mea Tau Fale i Samoa;*

O le a tuuina atu se vaegatupe i le Faalapotopotoga o Fale o Samoa e fesoasoani ai i le faatinoina o le latou faamāmāavega mo tupe nono e fausia ai fale o aiga e pei ona faalauiloa ia Aperila o le tausaga nei.

18. *Faaauauina le Fa'amāmāavega a le Faalapotopotoga o Malosiaga Tau Eletise;*

O le a faaauauina pea le faamamaavega a le EPC e o o atu ia Tesema lea na fuafuaina e faamaea ia Aukuso. O lenei fesoasoani o lo o tuutiitia ai le tau o le eletise i le 10 sene mo aiga ma soo se paaga a le EPC faatasi ai ma le 50% e faaitiitia ai le tau faaopoopo faapitoa mo le eletise i faletalimalo lea e maualuga ese lona tau i le taimi nei e fua i le tēlē o le faaaoga.

19. ***Faaauauina le Fa'amāmā avega a le Pulega o le Suavai;***
 O le a faaauauina foi le faamama avega a le SWA e tau ia Tesema mo le tuutiitia o le tau o le suavai i le 20 sene ma o le a ofia ai ma pisinisi i lenei faamamaavega.
20. ***Faaauauina le tuusaunoaina o le tologi o tiute ma lafoga masani mo oloa taumafa e pei ona faailoa atu i le masina o Aperila;***
 O lenei faamāmāavega sa faamaonia mo le tolu masina e amata mai ia Aperila e tau ia Iuni. Ua finagalo nei le Malo e toe faaauauina mo se isi tolu masina e tau atu ia Setema.
21. ***Faaopoopo Vaegatupe mo le Fuataga o le Ie Samoa (Faalelegapepe);***
 O lo o ave pea le faataua a le Malo i atinae lenei a tina ma tamaitai mo le lalagaina faaauulelei ma matagofie o le Ie o le Malo, o le measina a Samoa tatou te mitamita uma ai. Ua finagalo le Malo e siitia vaegatupe faatatauina mo le fuataga o le Ie Samoa mo le tausaga faaletupe fou i le \$1 miliona;
22. ***Siitia le Fesoasoani Tuusao a le Malo mo Aoga;***
 O le a si'itia i le \$3.6 miliona le fesoasoani a le Malo mo aoga uma o le atunuu ma faamauiina ai i le \$18 miliona mo le tausaga faaletupe o loma nei, faatusa i le \$14.4 miliona tala i le tausaga faaletupe o lo o faagasolo nei 2019/2020.
23. ***Siitia le penisione tologiina i masina taitasi i le \$15;***
 E pei ona ou taua muamua, amata atu i le masina o Iulai 2020 ona siitia le penisione a tagata matutua mai i le \$145 i le \$160 tala i masina ta'itasi.
24. ***Penefiti faapitoa mo le afaigaluega a le Malo, po o latou o Muā'au o lo o galulue e puipuia ma taofia le o o mai o le Koviti19 i laufanua o Samoa;***
 O lenei fuafuaga o le a faavaeina ai se penefiti faapitoa e fesoasoani i aiga o le afaigaluega a le Malo, poo Muaau ia a le Malo i auaunaga o faalavelave faafuasei e tuuina atu i aiga e amanaia ai lo latou tautua pe a a'afia ma maliu ona o le tulaga i le galuega.
25. ***Faaleleia Falemai Faaitumalo ma Fale mo Alii ma Tamaitai Fomai;***
 E tusa ai ma le faaiuga a le Malo e toe faamatuu atu i nuu i tua auaunaga a alii ma tamaitai fomai, ua i ai le faamoemoe o le a toe

faaleleia uma falemai faaitumalo ma apitaga mo le aufaigaluega ina ia siitia nei auaunaga mo nuu ma alalafaga i tua.

IV. OTOOTOGA O LE TALA O LE TUPE

Lau Afioga i le Fofoga Fetalai,

O le otootoga lenei o le Tala Faatatau o le Tupe mo le Tausaga Faaletupe 2020/2021:

<u>Tupe Maua</u>		\$ 838,229,858
Tupe Maua Masani	\$ 588,654,287	
Tupe Faameaalofa mai Fafo	\$ 249,575,571	
<u>Tupe Fa'aalu</u>		\$ 965,840,810
Tupe Fa'aalu Faaletulafono	\$ 137,428,197	
Tupe Fa'aalu I Polokalame (a Matagaluega)	\$ 688,694,610	
Tupe Fa'aalu I Atina'e	\$ 119,057,164	
Tupe Fa'aalu lē Fuafuaina	\$ 20,660,838	
<u>Fa'asiliga o Tupe Alu I Tupe Maua</u>		\$ (127,610,952)
Fa'atupeina mai:		
Nonogatupe e māmā tului	\$ 11,423,792	
<u>Fa'asiliga Fa'ai'u o Tupe Faaalu i Tupe Maua</u>		\$ (116,187,159)

O le aotelega o le Tala i le Tupe ua faamoemoe e faamauina ai se faasiliga o tupe faaalu nai lo tupe maua e tusa lea ma le \$116.2 miliona tala. A faatulaga i lalo o le Auivi o Faamaumauga o Tupe a le Malo po o le Government Finance Statistics (GFS)¹, ona maua ai lea o le aotelega o le faasiliga o tupe alu i tupe maua a le Malo e tusa ma le \$82.4 miliona tala, po o le pau e – 2.3% o le tamaoiga.

Lau Afioga i le Fofoga Fetalai, e leai se mea e faapopoleina ai le atunuu i le taimi nei. E faamamafa sau faamatalaga i le tulaga o lo o i ai tupe fa'aagaga a le Malo mo ana polokalame faatino aemaise o atinae e lagolago malosi ai le tamaoiga. E iai le faamatalaga sese o lo o faasalalauina e nisi e faapea ua gau le Malo ma ua le mafai ona totogi ana aitalafu. Lau Afioga i le Fofoga Fetalai, o lo o lelei ona faasoasoina e le Malo ana tupe maua e aofia ai vaegatupe fa'aagaga e \$89 miliona tala mo le totogiina o aitalafu lea o lo o aofia faatasi i Tupe Faaalu Faaletulafono e \$137 miliona tala. O le uiga o lea faamatalaga, a maea ona totogiina a tatou aitalafu e \$89 miliona tala mai ia tatou tupe maua tuu faatasi e \$838.2 miliona tala, e \$749 miliona

tala se vaegatupe e mafai ona faasoasoina atu mo le totogiina o le aufaigaluega, galuega faatino masani ma mafai foi ona faatino ai polokalame mo atinae tetele lea foi o lo o fesoasoani mai ai paaga e ala i tupe faameaalofa ma nonogatupe e faatupeina ai. A faapasene tupe totogi i aitalafu mai a tatou tupe maua i totonu lava o le atunuu, e na o le 11% o le tala e tasi o lo o faaaogaina po o le 11 sene mai le \$1 e tasi o a tatou tupe ia e aoina lava e tatou o lo o faaaogaina ai, ae avanoa le isi 89% o tupe maua mo galuega masani ma atinae faatino a lo tatou Malo. I lenei vaitau faigata, e tumau pea le talitonuga i lenei Faigamalo, e mafai ona tatou toe lalagaina se tamaoaiga malosi aua se manuia mo tagatanuu uma.

V. FA AVAE O TUPE MAUA

Lau Afioga i le Fofoga Fetalai, o le aotelega o **Tupe Maua** a le Malo e faamoemoe o le a faaitiitia i le 5% mo le tausaga faaletupe 2020/2021 e afua i le vaai taulai i le ono tuuitiitia o lafoga a le Malo ona o aafiaga i tulaga tau fefaatauaiga talu ai le faamai o le Koviti 19.

O le aotelega o **Tupe Maua Masani** o le a fa'aiti'itia i le 10%. E afua lea faamaumauga i le tuuitiitia o **Tupe Maua mai i Lafoga** i le 12% ae siitia **Tupe Maua a le Malo e ese mai i Lafoga** i le 12% i le tauaveina ai lea e le Matagaluega o Leoleo o le aoina mai o tupe maua mai le pasiaina o taavale fa'atasi ai ma sala mo soligatulafono i luga o auala tetele, o se galuega sa faatino e le Pulega o Felauaiga i le Lauele'ele (Land Transport Authority) i tausaga ua mavae.

O **Tupe Faameaalofa mai i Paaga masani a le Malo mai Fafu** o le a siitia i le 9% ma o lo o atagia ai lo latou agaga fia fesoasoani i le Malo auā le tali atu i aafiaga o le Koviti 19.

VI. ATINAE O LO O AVE IAI LE FA'AMUAMUA

Lau Afioga i le Fofoga Fetalai ma Sui Mamalu o le Palemene, O le aofa'iga o tupe faaalua fuafuaina mo le tausaga faaletupe 2020/2021 e \$965.8 miliona o lo o aofia ai ma tupe alu i atinae faatupeina mai fafo, ma e 1.5% ua pa'ū maualalo ai pe a faatusa i le tausaga faaletupe nei 2019/2020.

O le aotelega o lenei tuuitiitiga e afua mai i le faaitiitia o atinae faatupeina mai a tatou paaga mai fafo aua o le tele o nei atinae ua faamaeaina i le tausaga nei 2019/2020. O le tele foi o nisi o polokalame ma atinae sa fuafuaina e a tatou paaga mai fafo ua fetuunai nei ae ave le faamuamua i le faamatuuina faameaalofa mai o le tele o a latou fesoasoani ina ia fesoasoani mai ai i le tatou atunuu mo le tali atu i aafiaga ona o le Koviti 19.

O le fa'amoemoe mo Tupe Alu i le Taimi nei o le a siitia lea i le 5% poo le \$42.7 miliona ma o le tele lava o lenei siitaga o le Vaega Lua o le Fesoasoani a le Malo mo le Tali Atu i Aafiaga ona o le Koviti 19.

Lau Afioga i le Fofoga Fetalai, o le a ou ootooina atu vaegatupe ua fa'atatauina mo Matagaluega ta'itasi mo le tausaga fa'aletupe 2020/2021:

1. *Matagaluega o Faatoaga ma Faiga Faiva - \$15.5 miliona tala ua tuuina atu i ai;*

- \$11.9 miliona mo ana auaunaga masani;
- \$3.49 miliona mo Galuega e Avea ai ma Sui o le Malo.

O nisi o galuega tetele o lo o fuafuaina e le Matagaluega e aofia ai:

- \$500,000 mo le Faaaliga o Fua o Faaeleeleaga;
- \$500,000 mo le polokalame mo le faatamaia o le manu ai niu;
- \$300,000 e fesoasoani ai i le Women in Business (WIBDI);
- \$200,000 mo le fonotaga o le Komisi o Faiga Faiva o le Pasefika po o le Western and Central Pacific Fisheries Commission (WCPFC);
- \$150,000 mo le fonotaga a Minisita o Faatoaga i luga o mataupu tau faatoaga e le faaogaina ai vailaau.

O lo o i ai foi nisi o poloketi o lo o fesoasoani mai ai a tatou paaga masani mai fafo ma o poloketi tetele e aofia ai le:

- \$12.2 miliona mo le Samoa Agriculture & Fisheries Productivity and Marketing Project (SAFPROM) o lo o faatupeina e le Faletupe a le Lalolagi ma le Faalapotopotoga o le IFAD. Masalo ua le toe umi se taimi ona faapena lea ona faagasolo atu le fesoasoani leni e galulue faatasi ai ma le Matagaluega o Faatoaga faapea foi i latou o lo o galueaiina o tatou fanua.

2. *Matagaluega o Pisinisi, Alamanuia ma Leipa - \$7.5 miliona tala;*

- \$5.2 miliona mo ana auaunaga masani;
- \$2.3 miliona mo Galuega e Avea ai ma Sui o le Malo.

O galuega tetele a le Matagaluega e aofia ai galuega masani nei:

- \$200,000 e faaauau ai pea le fesoasoani ma le lagolago a le Malo i le vaega tumaoti po o le private sector;
- \$178,000 mo le polokalame Faa Aperenitisi (Apprenticeship Scheme);

3. *Matagaluega o Fesootaiga ma Faamatalaga Faatekonolosi - \$5.7 miliona tala;*

- \$2.6 miliona mo ana auaunaga masani;

- \$3.1 miliona mo Galuega e Avea ai ma Sui o le Malo.
- O galuega tetele a le Matagaluega e aofia ai galuega masani nei:
- \$1.7 miliona mo le lisi o fanua o lo o i ai upega faatekonolosi mo le SNBH fa'atasi ai ma pili o le eletise ma isi pili totogi mo lenei atinae;

O lo o i ai foi nisi o poloketi o lo o fesoasoani mai ai a tatou paaga masani mai fafo ma o poloketi tetele e aofia ai le:

- \$6.4 miliona mo le Poloketi o Fesootaiga o lo o fa'atupeina e le Faletupe a le Lalolagi ma le Malo o Ausetalia.

4. *Matagaluega o Aoga, Taaloga ma Aganuu – \$103.4 miliona tala le tupe ua tuuina atu i le Matagaluega o Aoga, Taaloga ma Aganuu;*

Ma ua talafeagai foi lea ona o le faamuamua lea e tuuina atu e le Malo i aoaoga, faapea foi le soifua maloloina.

- \$72.6 miliona mo ana auaunaga masani e aofia ai ma totogi o faiaoga uma a le Malo;
- \$29.9 miliona mo Galuega e Avea ai ma Sui o le Malo.

O galuega tetele a le Matagaluega e aofia ai galuega masani nei:

- \$18 miliona mo le fesoasoani masani a le Malo i aoga uma o le atunuu;
- \$6.5 miliona mo galuega i lalo o le polokalame mo le fesoasoani a Malo o Ausetalia ma Niu Sila;
- \$1.5 miliona mo sikolasipi e si'itia ai fa'ailoga taualoa mo faiaoga;
- \$350,000 mo le Iuni o Lakapi;
- \$200,000 mo le atinae o ta'aloga;
- \$150,000 mo le Asosi Netipolo;

O lo o i ai foi nisi o poloketi o lo o fesoasoani mai ai a tatou paaga masani mai fafo ma o poloketi tetele e aofia ai le:

- \$2 miliona mo le polokalame e fesoasoani ai mo aoga mo manaoga fa'apitoa;
- \$1.2 miliona mo se polokalame faaleaoaoga mo tausi soifua;

5. *Matagaluega o Tupe - \$133.3 miliona tala;*

- \$16.5 miliona mo ana auaunaga masani;
- \$116.8 miliona mo Galuega e Avea ai ma Sui o le Malo.

O nisi o polokalame tetele o lo o fa'atupeina i lalo o le Matagaluega o Tupe e aofia ai vaega nei:

- \$32 miliona mo le Vaega II o le Fesoasoani a le Malo aua le Tali Atu i Aafiaga o le Koviti 19;
- \$27.1 miliona mo le Penisione masani;
- \$13.5 miliona mo tiute ma lafoga totogi mo poloketi tetele faatupeina mai paaga masani mai fafo;
- \$5 miliona mo tau o fanua mo le faalateleina o le auala tele o le Cross Island Road;
- \$5 miliona o se vaega o le tau mo le malae vaalele i Fagalii e tuuina atu i le Samoa Airways;
- \$4.7 miliona mo le inisiua o aseta tetele a le Malo;
- \$1.5 miliona o le sao a le Malo i le faalateleina o le auala tele agai atu i Faleolo;
- \$1 miliona mo galuega faaleleia i le fale tele i Vaimea lea o lo o teuina ai aseta ma faila a le Malo;
- \$1 miliona mo le fausiaina o le pamu penisini fou a le Malo i Tuanaimato.

E \$126.3 miliona se vaegatupe o fesoasoani mai paaga masani a le Malo o lo o tu'uina mai i lalo o le Matagaluega o Tupe e fesoasoani lea e faatupe ai tuuitiitiga o tupe maua faatasi ai ma le vaega lua o le fesoasoani faamatuu atu i le atunuu e tali ai i aafiaga ona o le fa'ama'i o le Koviti 19.

6. Matagaluega o le Va-i-Fafo ma Fefa'ataua'iga - \$26.7 miliona tala;

- \$19.1 miliona mo ana auaunaga masani;
- \$7.6 miliona mo Galuega e Avea ai ma Sui o le Malo.

O nisi o fuafuaga tetele a le Matagaluega mo le tausaga faaletupe o loma nei e aofia ai:

- \$473,440 mo le faamoemoe o le siitia o le Ofisa o le Malo o Samoa i Iapani i Tokyo;
- \$200,000 mo le fonotaga aua le sainiga o le maliega o le European Union – African Caribbean Pacific (EU-ACP) e faamoemoe e faia mai i Apia ia Novema o le tausaga nei;
- \$150,000 mo le fonotaga o le Labour Mobility;
- \$100,000 mo le fonotaga o le Komiti mo Fefaatauaiga a le ACP-EU;

- \$100,000 aua tapenaga mo le fonotaga o faauluuluga o Malo o le Taupulega mo le 2022;

7. Matagaluega o le Soifua Maloloina - \$120.6 miliona tala;

- \$76.3 miliona mo ana auaunaga masani;
- \$44.3 miliona mo Galuega e Avea ai ma Sui o le Malo.

O nisi o galuega tetele a le Matagaluega o lo o fuafuaina e aofia ai:

- \$8 miliona mo gasegase auina atu i atunuu i fafo mo togafitiga;
- \$5.7 miliona mo galuega faatino i lalo o se polokalame faatupeina e le Faletupe a le Lalolagi mo le tuutiitia o faamai lē pipisi;
- \$3 miliona mo le faaleleia o falemai faaitumalo faatasi ai ma fale apitaga mo alii ma tamaitai fomaini.

O lo o i ai foi nisi polokalame ma poloketi o le Soifua Maloloina o lo o fesoasoani mai ai a tatou paaga masani e aofia ai poloketi tetele nei:

- \$2.5 miliona mo se polokalame faapitoa a le Faletupe o le Lalolagi mo le Faamai o le Koviti19;
- \$1.8 miliona e faatupe ai se masini fāata fou mo le falemai e fa'atupeina e le Malo o Ausetalia;
- \$1.5 miliona mai i le Malo o Niu Sila mo le maota fou mo tausi soifua i Motootua.

8. Matagaluega o Fa'amasinoga - \$13.8 miliona tala;

- \$12 miliona mo ana auaunaga masani;
- \$1.8 miliona mo Galuega e Avea ai ma Sui o le Malo;

O nisi o galuega fuafuaina a le Matagaluega mo le tausaga fou e aofia ai:

- \$500,000 mo galuega amata auā le ofisa fou o le Matagaluega i le Taulaga i Salelologa o le a faatinoina i lea tausaga;
- \$200,000 e fa'aleleia ai le tauluga o le fale fa'amasino i Mulinuu.

9. Matagaluega o Punaoa Faalenatura ma le Siosiomaga - \$26.8 miliona tala;

- \$13.2 miliona mo auaunaga masani a le Matagaluega;
- \$13.6 miliona mo Galuega e Avea ai ma Sui o le Malo;

O galuega tetele a le Matagaluega o lo o fuafuaina e aofia ai galuega masani nei:

- \$4 miliona mo tau'i o fanua e moomia e le Malo mo galuega faasao;
- \$3.9 miliona mo konakarate o le aoina o lapisi ma le teuina o nisi o fanua ma faasao a le Malo;
- \$500,000 mo le faasaoina o fanua tu lalata i punaoa suavai;
- \$500,000 mo le fausiaina o auala mo fanua lisi atu a le Malo.

O lo o i ai foi galuega a le Matagaluega o lo o faatupeina mai a tatou paaga mai fafo ma e aofia ai:

- \$11.2 miliona se polokalame faapitoa e siitia ai le mafai ona tali atu o nuu ma alaafaga tu lalata i le sami i aafiaga ona o le fesuisui'ai o le tau;
- \$3.5 miliona se polokalame a le GEF/UNDP aua le mataituina lelei ma le tapena lelei mo aafiaga ona o le fesuisui'ai o le tau;
- \$2 miliona mo le polokalame o le siitia o le talu atu i aafiaga o le fesui'aiga i le tau mo le Pasefika;

10. Matagaluega o Leoleo - \$26.4 miliona tala;

- \$24.4 miliona mo auaunaga masani a le Matagaluega;
- \$2 miliona mo Galuega e Avea ai ma sui o le Malo.

11. Matagaluega a le Palemia ma le Kapeneta - \$8.4 miliona tala;

- \$6 miliona o auaunaga masani a le Matagaluega;
- \$2.4 miliona mo Galuega e Avea ai ma sui o le Malo.

12. Matagaluega o Tiute ma Tupe Maua - \$13.2 miliona tala;

- \$10.6 miliona mo galuega masani a le Matagaluega;
- \$2.6 miliona mo Galuega e Avea ai ma Sui o le Malo.

O nisi o galuega tetele o lo o fuafuaina e le Matagaluega mo le tausaga faaletupe fou e aofia ai:

- \$676,750 e faauma ai le tau o le polokalame mo le faamauina o lafoga poo le Tax Information Management System;

13. Matagaluega o Tina ma Tamaitai - \$10.8 miliona tala;

- \$9 miliona mo auaunaga masani a le Matagaluega;
- \$1.8 miliona mo Galuega e Avea ai ma Sui o le Malo;

O se tasi o galuega ua siitia vaegatupe faatatauina i lalo o le Matagaluega e aofia ai le Fuataga o le Ie Samoa lea ua faagaga i ai le \$1 miliona.

14. Matagaluega o Galuega ma Atinae Tetele - \$25.2 miliona tala;

- \$4.9 miliona mo galuega masani a le Matagaluega;
- \$4 miliona mo galuega i nuu ma alaalfaga a le Pulega o le Malosiaga tau Eletise;
- \$4 miliona mo galuega i nuu ma alaalfaga a le Pulega o le Suavai;
- \$11.2 miliona mo atinae tetele a le Pulega o le Suavai;
- \$1.1 miliona mo Galuega e aveia ai ma Sui o le Malo;

E ese mai i auaunaga masani a le Matagaluega o nisi o atinae tetele o lo o fuafuaina mo le tausaga faaletupe fou 2020/2021 o lo o faatinoina fa'atasi ai ma le fesoasoani mai o tatou paaga masani e aofia ai:

- \$13.6 miliona e faatino ai se poloketi mo le faaleleia o femalagaaiga i le laueleele mo le atunuu e fa'atupeina lea e le Faletupe a le Lalolagi (Samoa Climate Resilient Transport Project);
- \$1 miliona e faaauau ai le atinaega o le taulaga o Apia (Apia Waterfront Development) lea o lo o fesoasoani mai ai le Malo o Niu Sila;

15. Ofisa o le Loia Sili - \$5.3 miliona tala;

- \$4.6 miliona mo galuega masani a le Matagaluega;
- \$725,702 mo Galuega e Aveia ai ma Sui o le Malo;

16. Ofisa o le Suetusi Sili - \$3.9 miliona tala;

- \$3.4 miliona mo auaunaga masani a le Matagaluega;
- \$568,037 mo Galuega e aveia ai ma Sui o le Malo;

17. Ofisa o le Komesina o Faiga Palota - \$8.3 miliona tala;

- \$2.2 miliona mo auaunaga masani a le Matagaluega;
- \$6.1 miliona mo Galuega e Aveia ai ma Sui o le Malo;

O nisi o galuega tetele o lo o fuafuaina e le Matagaluega mo le tausaga faaletupe o lo o loma nei e aofia ai:

- \$2.6 miliona mo le fausiaina o le Ofisa fou i Mulinuu;
- \$2.2 miliona auā tapenaga mo le faiga palota ia Aperila o le tausaga fou. O nei vaegatupe e aofia ai tupe faatatauina mo

tagata faigaluega faaopoopo e ono moomia mo le faatinoina o faiga palota faatasi ai ma le totogi o maota i nuu ma alalafaga o le a faatino ai fale palota.

18. ***Ofisa o le Fono Aoao Faitulafono - \$6.9 miliona tala;***
 - \$5.7 miliona mo galuega masani a le Matagaluega;
 - \$1.2 miliona mo Galuega e Avea ai ma Sui o le Malo.

19. ***Ofisa o le Komesina o Sulufaiga - \$1.6 miliona tala;***
 - \$1.4 miliona o lea vaegatupe mo galuega masani a le Matagaluega;
 - \$195,399 mo Galuega e Avea ai ma Sui o le Malo.

20. ***Komisi o Tagata Faigaluega a le Malo - \$5.1 miliona tala;***
 - \$4.3 miliona mo galuega masani a le Matagaluega;
 - \$891,248 mo Galuega e Avea ai ma Sui o le Malo.

E tusa ai ma le toe fetuunaiga o auunaga, ua faatinoina nei e le Komisi o Tagata Faigaluega a le Malo le vaavaaia ma le iloiloina o sikolasipi a le atunuu lea e faatupeina i lona tau aofai e \$27.6 miliona mai paaga masani a le Malo e aofia ai le Malo o Iapani, Malo o Ausetalia ma le Malo o Niu Sila.

21. ***Pulega o Galuega Tinei Mu - \$8.8 miliona tala;***
 - \$8.5 miliona mo auunaga masani a le Pulega;
 - \$375,195 mo Galuega e Avea ai ma Sui o le Malo;

22. ***Fa'alapotopotoga Faavae Tau Fatuga'o - \$8.3 miliona tala;***
 - \$4.99 miliona mo galuega masani a le Faalapotopotoga;
 - \$3.3 miliona mo Galuega e Avea ai ma Sui ole Malo;

23. ***Ofisa o le Tausi Mavaega - \$2.9 miliona tala;***
 - \$1.2 miliona mo auunaga masani;
 - \$1.7 miliona mo Galuega e Avea ai ma Sui o le Malo;

24. ***Pulega o Faailoga Taualoa – \$4.4 miliona tala;***
 - \$2.9 miliona mo galuega masani a le Pulega;
 - \$1.5 miliona mo Galuega e Avea ai ma Sui o le Malo;

25. ***Pulega o Tagata Tafafao Maimoa mai Fafu - \$12.7 miliona tala;***
 - \$10.5 miliona mo galuega masani a le Pulega;
 - \$2.2 miliona mo Galuega e Avea ai ma Sui o le Malo.

O lo o faamoemoe foi o le a faatinoina se polokalame mo le atinaega o le vaega maoti mo tagata tafafao maimoa mai fafo i lalo o se fesoasoani a le Malo o Niu Sila e tusa ma le \$1.7 miliona.

26. ***Ofisa o le Pule Faatonu - \$2.01 miliona tala;***
 - \$1.9 miliona mo auunaga masani a le Ofisa;
 - \$94,167 mo Galuega e Avea ai ma Sui o le Malo.

 27. ***Faalapotopotoga o Suesuega Faasaienisi po o le SROS - \$4.3 miliona tala;***
 - \$4.2 miliona mo galuega faatino masani a le Fa'alapotopotoga;
 - \$224,571 mo Galuega e Avea ai ma Sui o le Malo.

 28. ***Iunivesite Aoao o Samoa - \$24.7 miliona tala;***
 - \$22.1 miliona mo auunaga masani a le Iunivesite;
 - \$2.6 miliona mo Galuega e Avea ai ma Sui o le Malo.

 29. ***Pulega o Mala Taalo - \$2.2 miliona tala;***
 - \$2.1 miliona mo galuega faatino masani a le Pulega;
 - \$98,042 mo Galuega e Avea ai ma Sui ole Malo;

 30. ***Matagaluega o Faalapotopotoga a le Malo - \$2.9 miliona tala;***
 - \$2.3 miliona mo galuega faatino ale Matagaluega;
 - \$581,833 mo Galuega e Avea ai ma Sui o le Malo;

 31. ***Ofisa o Fuainumera Faamauina - \$5.7 miliona tala;***
 - \$3.8 miliona mo galuega faatino masani a le Ofisa;
 - \$1.8 miliona mo Galuega e Avea ai ma Sui o le Malo;
- O nisi o galuega tetele o lo o fuafuaina e le Ofisa mo le tausaga faaletupe fou e aofia ai:
- \$441,835 mo nisi o tapenaga mo le tusiga igoa (Population Census);
 - \$527,625 mo le faamaeaina o le faitauaofai o faatoaga (Agriculture Census);
 - \$115,000 mo le faamaeaina o le tuufaatasia o faamaumauga tau i le soifua maloloina o le atunuu.
32. ***Pulega o Felauaiga i le Laueleele - \$45.8 miliona tala;***
 - \$40.5 miliona mo auunaga masani a le Pulega;
 - \$5.3 miliona mo Galuega e Avea ai ma Sui ole Malo.

O lo o faatinoina foi i lalo o le Pulega nisi o poloketi ma atinae tetele a le Malo o lo o faatupeina lea mai fesoasoani mai a tatou paaga masani e aofia ai:

- \$7.2 miliona mo le faaauauina o le faaleleiina o le auala tele lea e amata atu i Toamua e tau i le malae vaalele i Faleolo;
- \$14.5 miliona le aofaiga atoa o se poloketi mo le siitia o auala a le atunuu o lo o faatupeina faatasi e le Faletupe o le Lalolagi ma le Malo o Ausetalia;

33. *Komisi o le Toe Fuataiga o Tulafono - \$1.4 miliona tala;*

- \$1.2 miliona mo galuega masani a le Komisi;
- \$255,519 mo Galuega e Avea ai ma Sui o le Malo;

34. *Matagaluega o Fale Puipui - \$8.1 miliona tala;*

- \$6.6 miliona mo auunaga masani a le Matagaluega;
- \$1.5 miliona mo Galuega e Avea ai ma Sui o le Malo.

VII. TUPE LE FUAFUAINA

O le aofa'iga o Tupe Le Fuafuaina mo le tausaga 2020/2021 e tusa ma le \$20.6 miliona tala e fua i le aotelega o polokalame mo tupe faaalu a Matagaluega o le Malo.

VIII. TUPE ALU I ATINAE

Lau Afioiga i le Fofoga Fetalai, o lo o lagolagoina atinae uma a le Malo i fesoasoani mai i a tatou paaga masani e ala i polokalame ma poloketi eseese o lo o faatupeina i tupe faameaalofa ma nonogatupe mo le tausaga faaletupe 2020/2021. O le faaauauina o nei atinae i leni vaitau faigata a o feagai ai Samoa faapea le lalolagi atoa ma le faamai pipisi o le Korona Vairasi, o se fesoasoani taua tele a tatou paaga e le gata ina maua ai galuega a le toatele, ae unaia malosai ai le tamaoiga o le atunuu i vaega maoti o lo o aafia ai.

Lau Afioiga i le Fofoga Fetalai, o lo o faaauau pea talanoaga a lo tatou Malo ma ana paaga i polokalame ma atinae ua fuafuaina mo le isi tolu i le lima tausaga o loma nei.

IX. TALA FAATATAU FA'APOPO LONA TOLU O LE TUPE 2019/2020

Lau Afioiga i le Fofoga Fetalai, e tuuina atu foi i luma o le Laulau a Fono a le Palemene le Tala Faatatau Faaopopo Lona Tolu o le Tupe mo le tausaga faaletupe 2019/2020. O leni Tala Faatatau Faaopopo Lona Tolu o le Tupe o le a siitia ai le faasiliga o Tupe Faaalu i Tupe maua i le \$3.5 miliona tala

ma e leai se aafiaga i le pasene o lo o i ai nei e – (1.6%) i le tamaoaiga le maualuga o tupe faaalu i tupe maua a le Malo.

X. UPU FAAIU

Lau Afioga i le Fofoga Fetalai, ou te le toe tau autalaina luitau o feagai ma Samoa aua ua nofofale ia Sa Tuiama'a le tulaga le ma'alofia ua oo i ai le tamaoaiga o Samoa, e o faatasi lava ma pagatia o lo o feagai ma le lalolagi atoa i le taimi nei.

O le atinae o Turisi, o se atinae pito i maualuga lea lona sao i tupe maua i le tu'ufa'atasia o atinae uma a le atunuu ma ua matuā a'afia lava i le taofia o faigamalaga o Vaalele. Ua tele le mana'o e faaleleia uma vaega o le atunuu ae paga lea, ua noanoatia pea laulu o Taemanutavae ona e fuafua tatau gaioga uma i le tupe e mafai ona maua mai i a tatou lafoga. O le ala tupe maua lea o lo o faalagolago i ai atinae a le Malo ma o le totogi o a tatou lafoga e atagia ai lo tatou lava sao i atinae o Samoa ma e faaosofia ai foi le agaga fia fesoasoani mai o Malo i a tatou fuafuaga tau atinae i le tatou nofo iloa, o lo o taumafai foi tatou tagata e tagi'ilima le faatupega o se vaega o a tatou foi atinae.

Tatou tatalo ina ia tumau pea le alofa tunoa o le Atua i lana pule faa soifua i luga o Samoa, ia manuia ma ola lausiusi a tatou la'au toto i le lafulemu o tatou laueleele. Ia toulu vāvā le uā mai le lagi e faasusuina ai o tatou laufanua ma faatutumuina ai punāvai aua le fofoga taumafa. Ia mamao faamai e lamatia ai le ola fiafia o a tatou fanau pele ma ia mana le lauga a o tatou ta'ita'i faaleagaga ia maua ai e Samoa le filemu ma le manuia mai le Atua Le Tama, Le Alo ma le Agaga Sa – O le Faavae papa o le Malo Tutoatasi o Samoa.

Lau Afioga ae le i faaumaina atu le lauga, na o nai upu laitiiti lava ia se i fai atu i o i le itumalo lau Afioga. O le vaega o le latou sao ma le latou tapuaiga i le po o le fala, aua le afifio o Tia ma Luamanuvae ma Tinousi ma le malelega i le Malietoa. Susu Sua o le Maopu, Nafanua ma le aiga, lau tofa i le Tuua, e te tausivaatele aua le Falefia ma le Falesalafai, le Lologapule ma le Faitoaga, e te lave i manino toe lave i aava. Tainane foi le feula mulila o le afioaga o Tafua aua le afio o Faasisina ma Alaalamatuatala, le afifio o Tapaau, alaالاتا Ulu ma Lemaota ma le mamalu i le Toiloto, aemaise le aufaigaluega paia a le Atua o lo o tatalo mai ina ia vave ona faauma atu faalavelave ma faamai o aafia ai lo tatou atunuu. O le tatalo ia manuia le alo atu o le tatou atunuu i le faamanatuina o le 58 tausaga o le Malo Tutoatasi o Samoa.

Lau Afioga i le Fofoga Fetalai, i lou agaga faaaloalo tele, ou te tuuina atu ai lenei Tala Faatatau Autu o le Tupe, mo le tausaga 2020/2021 mo le lauliliuina e le Palemene o Samoa.

Soifua ma ia manuia.

Na faaalua le agaga fiafia o le Maota i le patipati o latou aao i le maea ai o le Saunoaga a le Afioga i le Minisita o Tupe.

FOFOGA FETALAI: Malo faafetai. Ia, ou te tapa lau Afioga i le Palemia mo se saunoaga.

SAUNOAGA A LE PALEMIA MA LE LAFO MO LE TOLOPOINA

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai ma le mamalu o le tatou Maota e sili ona toe aumai se patipati tele o lea ua sii a tatou penisiona.

Lau Afioga i le Fofoga Fetalai ma le mamalu o le Maota ou te tulai atu e faatu le lafo, *Ina ia tolopoina nei Taualumaga o le Fono Aoaio Faitulafono seia aulia le aso 26 Iuni 2020 i le itula e 9.00 i le taeao.*

A o le i faaluaina le lafo ma aumai le fesili, ua ou manatu e tataua ona tulai atu e fai sina upu faafetai. E faafetai i le Afioga i le Minisita o Tupe ma le latou galuega o le tau autalu o nai seleni, ina ia mafai ona maua e faatupe ai le tatou toe Tala leni o le Tupe tausaga faaiua leni o le tatou Paeaiga. E faamalo le tau autalu solo mai o seleni.

Na ou faalogo o fai mai le tuualalo ma le faasilasilaga malosilava, o le isi foi itu faaupufai fou lea na ou faalogo atu i ai, fai mai e omai loa i totonu o le Malo, soloia loa i le aufuefue lafoga uma lava, ae matua faasaga e fai le aisiga i fafo e aumai e faatupe ai tatou atinae pe a omai lea i totonu. O lea ua tatou faafogafoga e le o se mea e avane ai le tulaga matuia lea ua oo i ai le lalolagi i le faamai ua aofia uma ai lava le lalolagi atoa aemaise foi i latou o atunuu, o tatou paaga masani ona fesoasoani mai. E oo lava i nisi o nei atunuu malolosi e tele tupe, o la foi ua fai a latou nonogatupe e faitau piliona ma piliona tala, o le auala lea faale-Malo e saili ai galuega a tagata. Ua ou faalogo faapea ua ova i le 36 miliona tagata i Amerika, e pei o lau faalogo lena i ai. E talu ai ua leai ni galuega, o Niu Sila o lea ua ta sui kia o a latou taavale. O lea ua toe talosaga isi sa paie ma nofonofo e faalagolago i seleni lea e aumai i le Malo, ua toe fia faigaluega, ona ua tilotilo atu, e oo foi i le Malo ia ua aafia a latou seleni. O lea la ua toe fai ai le iuga a le Malo, o mea lava ia e tutupu, e toe faafoi mai le toatele o tatou tagata sa galulue i totonu o faatoaga, ua ou faalogo e ono oo i le 800 o tatou tagata e toe faafoi mai. O aga lava ia o le soifua, e le o ni mea e te'i te'i ai tatou, tatou te nofo uta ai. Ae faafetai ua taoto ia fuafuaga mamao i le mataalia o le Minisita, i le tulaga o le televave o a latou faatalanoaga ma faletupe tetele nei o le lalolagi, ia ma faamautu ai ia fesoasoani ua tatou maua, e faapea foi ma feutagaiga maaleale ma atunuu o lo o tatou faipaaga. E ui lava o ia faalavelave e tutupu mai, ae

le o uma lava le agaga Samalia agalelei e fesoasoani mai ai ia Samoa, talu ai le vaavaai mai, o lo o lelei faatino le tulaga o le tele o tatou atinae o lo o faaoga i ai a latou seleni, o seleni e maua mai i le afu a latou tagata totogi lafoga. O le faafetai lena lau Afioga i le tatou faalogologo i le faasoa mea lelei, ua tatou faalogologo nei i ai.

Lau Afioga i le Fofoga Fetalai, o lea foi ua tatou tilotilo i le tulaga o Tulafono Tau Faaofi o le Faatatauina o Tupe, o lea o le a see atu foi i le Komiti a le Palemene, o aga ia faa-Palemene, Tulafono Tau Faaofi o le Faatatauina o Tupe, e 14 aso, o lea o le a see atu i le Komiti latou te soalaupuleina, ma latou e silafia mea tau tupe, ma valaau uma mai ai ma Ofisa Sili o Matagaluega a le Malo ma Faalapotopotoga lea tatou te faatasi ai i lenei taeao. O le soalaupule, e le o se aga fou, o le aga lava ua leva. E faatalanoa ata o le Tulafono iinei, ona alu ai lea i le Komiti latou te soalaupuleina, e le faapea o ni Tulafono ua pasia, e leai. O Tulafono faataitai. E foi mai i le Komiti ua atoatoa, e pei lava o le tulaga, tulou lava, o le sauniga o le suavai, e valu faamataasi atu ulu, ae faamama mai o i le Komiti ona toe foi mai ai lea i totonu o le Palemene. E faapena aga o mea nei o Tulafono, e lua mea tetele, e eseese e pei lava o le mamao o sasae ma sisifo i le mea e oso ai le la ma le mea e goto ai le la, e eseese mamao mea ia. E alu atu loa i totonu o le Maota lenei, o le Tulafono Tau Faaofi, e le i ofi i totonu o Tusi Tulafono. E pei o le vaa foi lea e folau mai, taofi i fafo ae se i o atu vaa e tau faaofi mai i totonu o le ava. O Tulafono uma lava tatou te faia iinei, e le i avea o se Tulafono, o le igoa lena o le Tulafono Tau Faaofi, e le o se Tulafono ua faaiuina. O le Tulafono tau faaofi, o le ala lena e ave ai i o i le Komiti, e le i mafai ona avea o se Tulafono ua pasia e le Palemene lenei. Ua ala ona ou taua le mea lea, ona o au ua te i. Ua te i manatu o isi, ua uma ona pasia Tulafono ia e tolu. E faafoliga uma lava mea na e fai nei. E leai se Tulafono ua faaiu ua pasia o le a galulue ai faamasino faapea foi ma loa, seivagana ua pasia i totonu o le Maota lenei, ua uma le soalaupulega, ona faatoa tau loa lea o le Tulafono lena, o le Tulafono ua pasia. Ae o Tulafono uma lava e tau o Tulafono tau faaofi, e le o ni Tulafono ua pasia e le Maota lenei, na o ni Tulafono o se ata faataitai, e tilotilo i ai i le tulaga toe teuteu ma toe teuteu.

Lau Afioga i le Fofoga Fetalai, ua ese le tulaga lea ua i ai le lalolagi, ua matua ese mamao le tulaga lea ua i ai le lalolagi i nei ona po. E fou lava solitulafono e tulai mai. O le a alu atu sina faataitai, o uiga ia e sau mai fafo. Faataitai, ina ua amata ona tatou faataitai i le mea e igoa o le palota, e tele lava tetee sa i ai, aisea? Aua foi o iuga lava ia faale-atunuu e lauliliu le tofa, upu masani e lauliliu faalaaui mamafa le tofa a alii ma faipule i totonu o latou maota fono. O fonousu a le nuu e nofoia ai ia nofoafono, o le maota fono a le nuu. E tasi loa le tofa, o le iuga lena, o le iuga lena e fai. A lauliliu, lauliliu le nofo a tulafale i pou o lauga, afai loa ua le maua e latou se faaiuga, lafo loa i le pou o matuatala, ona aumai loa lea e alii sili o le nuu o lo o

saofafai i pou matuatala le faaiuga mausali, e mulimuli ai le nuu. Ona faapefea lea, ona avea loa lea o alii o le nuu, ua faia le iuga e tusa o lea ua tootoalii le fonu. Ua nofonofo tulafale, ae ua fai loa e alii o lo o saofafai i matuatala ia tulafono a le nuu e mulimulitu'i ai uma ia tagata uma. O ai se taulealea po o se tagata e faatu'ala i le afioga ua paū, ua i ai sala e faataoto e le nuu. O aga na a lo tatou aganuu.

E i ai le togisala e i ai le vaesala, o lona uiga o lea lava e i ai le tulafono o le suesuega muamua i le faapapalagi, ae o lea foi e i ai le tulafono o apili, pe a fua i le faapapalagi, o lea e ia i totonu o le atunuu lenei. E o mai papalagi ua leva ona taoto a tatou tulafono, o tulafono faale-aganuu. E fai le sala o latou e totogia sala, e totogi sala, ae i ai le vaesala, e faia e latou o tamalii o le nuu.

Lau Afioga i le Fofoga Fetalai, ua tele ma anoano uiga mai fafo ua lu'itauina ai a tatou tu ma tatou agaifanua sa tatou masani ai. E i ai le tausaga na usu ai le fonotele iinei, i le tausaga e 1996, na o mai ai ia Minisita, ona o atu lea asiasi atu ia te au. E toafa lelei Minisita, o le isi e sau mai Toga, Solomona, Vanuatu ma Fiti. Na iinei i Samoa i le 3 aso a o le i usuina le fonu, ona o mai loa lea taamilo i tua. Ona o atu lea matou talanoa, fai mai le tala a latou ia. "E fia Tuilaepa se tupe o faaalu e le tou Malo e teuteu ai tou nuu ma tou malae. E matua matauia le mama. A tuu ae i le matou Malo o Fiti, sole ou te matua ma... ou te foi atu nei, ou te matua ma i le mea la e tupu i le matou atunuu, e lapolisia uma." Ona ou ata lava lea ma ou fai atu, e leai, o matou tu na ma matou agaifanua. E fai e le pule mamalu a alii ma faipule faapea foi faletua ma taus. Ae fai mai, se soia e te pepelo. Ou fai atu, o le tala moni lava lea ou te fai atu ai. O le tala a Minisita nei, "se amuia Samoa, amuia Samoa o lo o malu pea le pulega mamalu a alii ma faipule. Lau Afioga i le Fofoga Fetalai, e tele le mau solitulafono lea ua puna mai fafo, ma o lo o vevesi ai pea le lalolagi, ona o nisi o nei solitulafono ua mau mai lalo o le faamalulu o le aiatatau. A tau fai atu alii ma faipule i lea mea, o lau aiatatau, tau fai atu alii ma faipule i lea mea, o lau aiatatau. A tatou faitau i le Tusi Paia i le mea maoae na tupu ia Sotoma ma Komoro, na auina mai le teio mai le lagi e susunu ai, aisea? Ona ua latou solia poloaiga a le Atua, poloaiga, lea ua pasia nei e le tele o Malo le mea tonu lava lea e tau o le aiatatau. Ua aiatatau uma lava mea.

E oo i le solitulafono o le fasioti tagata ua pasia tulafono a Malo i fafo ua faataga. O le fasioti tagata e auala i le faapau o pepe, a o lea o lo o maoti talitonuga faakerisiano. O le taimi e to ai le fafine o le meaalofa a le Atua na aumai i le tagata e fesoasoani ia te ia i le tulaga o le gaosiga o le tagata, ina ia le toe taumafai ai e tase'i mai ivi asoaso o tamaloloa e fau ai le fafine. A na faaauau le mea lenei, e faapenei ua toatele i tatou ua feoai ua leai ni ivi asoaso. Ae ua sui atoa e le Atua i le faatuina o le faia o le tane ma le fafine, ona faatino lea i le sakalameta e paia, o le sakalameta o le faaipoipoga, na o le Atua na te soloia. O lea la e alu ai le lalolagi o atunuu kerisiano. O le a le

mea lea e tupu i le anoano o atunuu kerisiano? Ua faataga, poloaiga na faasa e le Atua ma faamalalaia ai Isaraelu, ua faataga. Faataga i lalo o le a? Faataga i lalo o le aiatatau, o le tauga lautele o le aiatatau, le aiatatau lava lenei, ua faaoso mai ai i totonu, ua faamaulu mai ai i totonu ma isi mau solitulafono, lea ua talia e le tele o atunuu o le lalolagi. Ma ou te manatu e le tupu fua mea nei ua tupu nei i le lalolagi. Si nei lava tamai siama, ae ua le iloa e atunuu ona fofo, o atunuu na o latou fausia le pomu akomika. O le taimi lenei e tasi lava le pomu e pa ae soloia le lalolagi atoa, oti uma tatou. O atunuu ua o i le masina, le atamamai o latou Saienitisi, ua oo i isi paneta e i tua atu o le masina, ua oo i ai, ae oo ane i si nei lava tamai siama ua matua le iloa fofo. O le uiga lena o le mamalu ma le poto o Le ana mea uma na Ia faia i Lona malosi, o le Atua o lo o faavae ai Samoa.

Lau Afioga i le Fofoga Fetalai, e tele ma anoano le mau soligatulafono fou lea ua tulai mai i le lalolagi, ma e fou lava ia soligatulafono e tupu mai pea, tupu mai pea, tupu mai pea. E 2 mea ou te fia taua, ina ua talia e le tatou Malo faiga ia mai fafo e fai le palota, o tatou tofi sa le masani ona faia faapena, sa filifili lava i le filifiliga saoloto a alii ma faipule. Ae ua tatou o nei i le faiga faapapalagi o le fai o palota faalilolilo. O le a le mea ua tupu? Liliu loa i latou o e sa taitai i na ona po mai o i Vaisigano, fai loa faatetele faigapalota ma faaigoa o palota o matai palota. O le a le mea na oo i ai, ua sasao faa-afi ae mafua mai fea? Mafua mai fafo. Ona amata ai loa lea on ape le mea lea, ua le o toe agai le atunuu e faatino le pulega mamalu a alii ma faipule, latou te faia ai faaiuga, ae ua tatou o i mea a papalagi, leaga o mea ia o lea ua fai mai ai le Faavae. Le Faavae na fesoasoani papalagi i le tusiaina, ma tatou sosolo ai i luga i le filifiliga faamalo i fafo i le mea lea na o ai le lalolagi. O le a le mea na tatou faia? tatou liliu loa, fai le faiga e taofia ai, aua e ala ona soona fai nei matai palota ona o le fia malo, e oo mai i totonu i upufai o Malo, ma saofai i nofoa ia tatou te saofafai ai nei, ona liliu loa lea o le Malo o le HRPP ma teuteu loa le Faavae. E ala ona taua le mea lea, o teuteuga nei sa faigata tele ona fai i tua atu o le Faigamalo o le HRPP, ua tulai mai faiga vaega, aisea? E faigata tele i Taitai i tua atu ona fai, ona ua le o lea le tulaga ua i ai le Maota o Samoa, ua ese ia talitonuga, o le ala lena na faigata ai, ona ausia le 2/3 i na ona aso. O lea la ua fai e le HRPP ona teuteu le Tulafono, ma tatala ai loa le atunuu lenei noataga ina ia tatou faia loa le **Universal Suffrage** ua tatala le palota, taofia ai le mea lea, ua mataga ai ma memei ifo i lalo le taua o le tatou faamatai, i le soona fai o matai. O lea foi la ua tatou toe i ai i le mea lena i le taimi lenei, ua uma atu le tulaga o faigapalota, ae i ai le isi mea lea ua agai mai. Ua le mafai le manao, e tatau lava ona i ai se auala e mafai ai ona tatou faataua, tatou faiga matai, o matai ia e pulea le atunuu. Ma e tatau foi, o le tatou taimi o tatou o augatupulaga i nei onapo o tatou o Taitai, o lea ua pasi mai i ai le tiute, e tatau ona fai o tatou tiute. Tapue atili le tatou faamatai, ae soia ia le tosina i mea vaivai. Afai ua uma atu o tatou tuua na faatino foi le latou galuega, ona pasi mai lea

o le polo ia i tatou, i le tatou vaai ma le faaeteete ma le faautauta, le puipuia o tatou tu ma tatou agaifanua. O ai se o toe aisilia, o tatou ia ua pasi mai i ai le tiute, o tatou o matai. Fai mai upu a toeaia e faaupu i pese, “O le matai ua vavae i ai le tofi o le Atua, o ia lea na te vaaia le tulaga o ona aiga, o ana measina”.

Lau Afioga i le Fofoga Fetalai, o le mea lena e tatau ona mataitu lelei e tatou. o le tilotilo lelei i suiga nei e sau mai fafo. Na luga lalo le Maota lena, ina ua aumai e le Faigamalo e le HRPP i le 1999, se manatu e taua tele. Ua tatau ona tatala le tatou Matagaluega o Falemeli ma Uaealesi, toese mai le tulaga o le telecommunication, ae faafaigaluega loa e avea faapisinisi. Aisea? Ua vaai le Malo i na taimi, i le maoae o le atinae o atunuu o lo o faalagolago i fesootaiga televavave. O lo o manaomia foi e Samoa fesootaiga televavave i totonu ma fafo. E le fia manatua na aso, e 3 itula o laulau i le 2AP ia igoa o i latou e o mai e tala atu a latou tupe. Ua a nei? Ua leai, ua faaoga le telefoni. O lea la ua siitia le tulaga o fesootaiga televavave e faigofie ai ona faatino le tele o pisinisi a le atunuu, ma maua ai seleni e faatino ai ia tatou galuega. E faigofie ai i matua ona fesootai ma fanau pele i atunuu i fafo i le taimi lena, e te talanoa atu lava o la e tilotilo mai ma talanoa mai ia te oe.

Ua faigofie nei ona fai faigalotu a matua ma fanau, e fai lava i inei ae **participate** mai lava latou. O lea ua tatou vaavaai i le uiga matautia, e mafai ona sau le pese i luga o TV, ae eseese itu o le lalolagi la e nofonofu mai ai, ma pese, ae taimi atu i inei e le Taitai Pese lea e i inei Samoa. Na ou vaai ai i le mea lea i le tausaga e 1987 ina ua tofia au e avea ma sui o Minisita o Mataupu tau Uaealesi ma Fesootaiga Televavave a le Pasefika na usuia ai le fonu i Singapore. Na ou vaai loa i mea ia, tupu ae loa ma le mafaufau, o le a ou foi mai ma ou talanoa ia Tofilau, ina ia toe teuteu a tatou Tulafono, tatou te agai i le mea lea ua i ai le lalolagi.

O lea la ua maualuga le tulaga lea ua i ai Samoa, i le taimi lena, ua i luga uma atunuu o le Pasefika, ae o la e i lalo tatou. O le tulaga nei lea ua avea nei Samoa ma taitai o atunuu o le Pasefika i le televavave o fesootaiga lea ua i ai nei e fua i tagata i lo latou faaogaina o telefoni. Ae o le a le mea lea ua sau ai? Lea ua sau ai ma le isi solitulafono maoae, o le faaleaga tagata e faaoga ai telefoni ae lalafi i tua. O upu maoae ma tuuaiga le faavaea, ua sau ai. E le i manatu le tatou Malo o le a fanau mai ai ni soligatulafono faapea.

O le uiga o lau faamatalaga, mea ia e 2 na ona ou faamaalo a iuofe, ia tatou malamalama ai i le uiga e tatau ona i ai le Faigamalo ma le Paeaiga a le Palemene, e le na ona tatou omai tatou te nofonofu i le malū, o tatou potu ma faalue ai. E tatou te mataala, mataala i taimi uma. Afai foi tatou te iloa se mea ua faaletonu, e le lava lou iloa ma e nofonofu. E tatau ona iloa ma gaoioi loa, gaoioi loa e aumai Tulafono, e tatau ona teuteu ai lea mea ma lea mea e taofiofi ai le amioleaga ma ua tupu le amio leaga. Vaavaai vaavaai

lava i le TV tupu ae manatu o isi fanau, tatou o e faataitai i ai, tatou o tatou te faataitai i ai, i mea ia e tutupu mai i fafo.

O le a le mea lea ua tupu i le tele o nuu? O le aiatatau lava la lea, lea la ua agai ina vaivai ai le pulega mamalu a alii ma faipule, e tau taofiofi le amio leaga. A tau alu atu le faaiuga a alii ma faipule, ae faapea mai e leai se tou aia. E i ai le matou aiatatau, aisea? Aua foi a oo mai i le Faamasinoga, o i ai se aiatatau i totonu o le Faavae? O i ai se aiatatau a pulega toatele? E leai se mea, e leai se mea o i ai. E na o aiatatau a tagata taitoatasi. O le mea lena lea e misi atoa i le Tulafono o Tulafono e 3 ia e ave nei i tua.

O le molimau a le Faamasino Sili talu ai, e fai ana faaiuga i le mea lea e fai mai ai le Faavae. E fua i ai lana faaiuga, o le a le mea lea e fai mai ai le Faavae? Aia taitoatasi, ae gugu ia aia a alii ma faipule. Ia o lea lava tatou te molimauina, alu alu lava ia faamasinoga faalogo atu, malolo alii ma faipule. Alu alu lea faamasinoga, tatou faalogo atu, malolo alii ma faipule. Ae o le a le mea lea ua tupu?

Ua tupu le amioleaga i totonu o tatou nuu. Ua avatu le faaiuga ae tete mai ua feoi isi ma laau malosi, o tamaiti, totonu o le marjuana. A tatou le faaeteete i le mea lea, talofa i le pule mamalu a alii ma faipule. O la ua amata ona vaai atu i nuu, e pei ua tau fefefe matai e fai. Mafaufau atu e aumai i le Faamasinoga, o le a le mea o lo o aumai e le Faamasinoga? Aiatatau a tagata taitoatasi. E i ai lava le lape, e ono i ai foi le lape i pulega faitele, a o le aiatatau a tagata taitoatasi ma aiatatau toatele, ina ia aloaia tutusa i totonu o le tatou Faavae, o le mea lena lea e agai i ai ia Tulafono e 3 o lo o fai nei.

Lau Afioga i le Fofoga Fetalai, o le tulaga la i mea ia e 2 ina ia manino lelei i le faafogafoga a le Maota lena, o le eseese o Tulafono e tau o Tulafono Tau Faaofi. E le i avea ma Tulafono. E na o se mea faataitai, le eseese o le Tulafono Tau Faaofi ma Tulafono ua pasia e le Maota lena.

O le faauigaina o se Tulafono ua pasia e le Palemene ma le faauigaina so o se Tulafono Tau Faaofi, e matua le tutusa lona faasologa. E eseese mea ia e 2. E pei lava ona ou talanoa atu, e pei lava o le eseese o sasae e oso mai ai le la, ma sisifo e goto ai le la. A faauiga le Tulafono ua pasia, e fesoasoani pe faaoga e loia ma faamasino se Tulafono o le Faamatalaina o Upu 2011, **The Acts Interpretation Act 2011**, ma iuga o faamasinoga ua maea **Court Decisions**, i le faauigaina o lea Tulafono, ma lea Tulafono, e pasia atu e le Palemene.

Ae a faauigaina Tulafono Tau Faaofi, e taua tele le agai o lou tagata i tua i faiga faavae. O faiga faavae o na Tulafono Tau Faaofi, pe a i ai se agaga e fia faia se fesoasoani, se sao mo na Tulafono Tau Faaofi. Pe afai i lau faitau malamalama, ma sou finagalo e manaomia e na Tulafono Tau Faaofi se toe faaleleiga. O lona uiga se toe tapueina, manatua o le Tulafono Tau Faaofi. Ia tatou manatua ai, o lau faauigaina i lea taimi, e matua leai, leai, leai se mamafa faale-Tulafono aua foi e le o se Tulafono ua pasia, ona e le i pasia le Tulafono e le Palemene. Ua na o ni Tulafono Tau Faaofi. O le ala lena o

lea e filifilia ai le upu lea Tau Faaofi. E le i maea ona lauliliuina ma tuu i ai se finagalo autasi po o se finagalo fulisia foi o lenei Palemene ia pasia, ina ua uma ona soalaupuleina faaiu e le Palemene lenei. O lona uiga e toe foi mai lava le Tulafono Tau Faaofi i inei i le Palemene, e toe fai i ai lana soalaupulega faaiu ona faatoa pasia ai lea.

E i ai le Tulafono ua uma ona soalaupule, ona sau loa lea i le Palemene o le a fai le iuga faaiu i le tulaga o le faatulagana o tuaoi, o le aupalota lea taitoatasi, na ou toe faalava ai, ina ua ou vaai atu, e tele le fetuiai i totonu o le Palemene i le Tulafono lea. Na ou faalava ai, toe foi lelei lava le Tulafono i o i le Komiti sei toe faaauau le soalaupulega, ona o lea ou te vaai atu o au o le Taitai o le Maota lenei, e le i lava lagolagoina le Tulafono ona e i ai vaega e tatau ona fetuunai, ona toe foi ai lea i le Komiti, toe soalaupule foi mai i totonu o le Palemene, tumau pea lau lafo. O au o le Taitai o le Malo, o le lafo a le Malo. Ia ona faatu loa lea o le lafo a le Malo, tatala ma le palota, palota lava le tagata ia i lana aiatatau, sau le iuga, 13 palota e lagolagoina le Tulafono a le Malo e aofia ai ma a'u, matou ma Fime matou e aofia uma i totonu o le Kapeneta. O lea foi e ee mai le sui usufono le Afioga ia Fonotoe sa matou lagolagoina le Tulafono, a ua tatala le palota, ia ae tulai mai le toatele o sui usufono, tetee i le palota, pau ai lea o le lafo, tafea le lafo.

Lau Afioga, o faiga malamalama na, faatemokarasi, a o nofo mai i le Nofoa le Afioga ia Laauli e tatau ona ia toe manatunatu ma malamalama i faiga ia faa-Vaega. Lau Afioga, ona e le i pasia se Tulafono Tau Faaofi i le Palemene, e le mafai ona avea ma Tulafono. Ua na o ni Tulafono Tau Faaofi e le i maea ona lauliliu ma tuuina i ai finagalo o le Palemene, ina ua uma le toe soalaupulega faaiu ua mafai ona ou toe taua le itu lea, ona e i ai tatou sui usufono i le Maota lenei ua fai so latou taofi i Tulafono ia e 3, ua uma ona pasia ma e maumau le taimi e toe fai ai soalaupulega.

O upu ia o lea e faafogafoga mai le nuu lea o le itumalo lea ua ou tautino atu i i aga masani, aga ia na sau ai le Maota lenei mai lava i le tausaga e 1962, e le o see ese ai lava le Maota o lo o solisolimuliaao pea i o tatou taitai na tulai mai i le taimi o lo tatou Tutoatasi o Samoa.

O le fesili; o le auga ma le faamoemoe autu o ia Tulafono, o le a tonu lava le mafuaaga? O le a le agaga? O le tali; i le aotelega, ia atagia atili le tatou atunuu o Samoa ma ana tu, ma ana agaifanua i totonu o lana Tulafono Faavae. Ia foliga Samoa a tatou Tulafono Faavae. I le taimi nei, o Tulafono ia e 3, ua na o ni Tulafono o lo o tau faaofi, e le i oo mai i totonu o le Palemene, mo le iuga faaiu. O se Tulafono e pei o se vaa foi lele o lo o tau ofi mai i totonu o le taulaga ae o lea e taofi atu, e le i oo i le taimi e te ofi mai ai i totonu o le taulaga.

E faapefea ona faia lea tulaga? I le tuuina lea i totonu o tatou Tulafono Faavae o Samoa o mataupu tau Samoa e iloa atu ai o le Tulafono Faavae a Samoa. O a ia mataupu faatatau ia Samoa ia foliga Samoa? O lana Fale Faamasino o Fanua ma Suafa, o lo o saofai ma faia ai faaiuga i mataupu ma

faamasinoga o Fanua ma Suafa a Samoa, lo tatou atunuu ua leva ona tutoatasi. O le uiga moni lena o Tulafono Tau Faaofi po o Tulafono o lo o Tau Faaofiofi. E le i ofi lava i totonu o Tusi Tulafono ua pasi, ua **finito**, ua uma. O lona uiga, o mafaufauga faapea o le a feteenai Tulafono Tau Faaofi ma aia tatau a tagata taitoatasi, leai, leai, leai lava se fesootaiga ma le agaga tonu po o le faamoemoe aloaia o nei Tulafono Tau Faaofi. Aisea? Aua foi o Tulafono Tau Faaofi e fau, toe faufau, ma toe saga faufau ma toe atili faufau ina ia aua ne i feteenai ma le Tulafono Faavae o lo o i ai nei, lea e i ai aiatatau na o aiatatau taitoatasi, lea foi e taumafai e tuu loa i ai ma tatou foi aiatatau toatele a alii ma faipule, e le faapea o aveesea aia tutusa. So o se Tulafono e faia e so o se Palemene, e faia mo le lelei o tagata uma o le atunuu. O le fauina la o Tulafono ia aua ne i aafia tulaga o lo o i ai le faataatiaga o tulafono pe afai e faaofi i totonu se faiga faavae fou. Afai lava e aafia, ia aafia i se tulaga e mafai ai e le Tulafono Tau Faaofi ona toe faapoo atu mea e lelei, na o mea lelei, mea lelei lava e toe faapoo atu mo le lelei atili o tatou tagata ae le o le aveesea o se aoga ma se lelei o i ai. O le agaga lena o nei mea o Tulafono Tau Faaofi o lo o soona vevesi ai i latou e fia vevesi, ma te i lava ua nonofo lava latou ma faavevesi latou ae leai, o lo o toa lava le Malo ona o lo o malamalama lelei le Malo i le faavae o Tulafono. O nei foi Tulafono, e le soona te'i te'i lava pasia. A foi o totonu lava i inei i le Palemene lenei na alu atu ai sa tatou feiloai ai i inei?

I le Fono muamua lava a le Palemene ina ua tuanai le Semina a le tatou Palemene, atonu na i ai nisi sui usufono e le i auai, ia ma le Faamasino Sili. Na ia ootoo mai ai tulaga manino lelei o le Faamasino Sili, ua siliga ma le 20 tausaga o saofai ai i nei mea ma fai ana faaiuga, ma ia faamatala mai ai mea e lua. O le mea muamua lena, e leai leai lava ma se taua o upu taiala o le faavae papa o lea tatou te gagana ai i aso uma. E leai, leai leai se taua o upu nei, o le Malo o Samoa e faavae i le Atua o i totonu o articles, totonu o le fatu o le Faavae, o la e i fafo o le Faavae, o le mea e igoa o le **preamble**, o le faavaa. A oo la ina tulai mai se Tulafono e aafia ai mea tau lotu ae agai e se i mai le Faavae, upu la e i ai, e le taulia, e le aloaia, a o lenei ua ova ma le 50 tausaga o tatou talanoa, le Atua Silisili na te silafia mea uma o lo o ia silafia lenei faasese o lo o faia pea. Lau Afioga i le Fofoga Fetalai, o le tulaga lena o le vaega na fautua mai ai le Faamasino Sili e le o i ai i totonu.

Ma le lua ina ua fesiligia le mea lea e tupu, fai mai foi, o le Faavae o Samoa e faavae i le Atua ma ana tu ma ana agaifanua, e leai foi se na mea o i ai. Fai mai le fautuaga, e leai se aiatatau a alii ma faipule o i ai i le Faavae, na o luma foi i le faavaa lea e i ai upu na e le aoga, e le taulia. Lau Afioga i le Fofoga Fetalai, atonu o i ina na tuu ai i tulaga o mafaufauga na i ai i na ona taimi, se i tatou ofi atu ai i le Malo Afaatasi, ona o totonu o le Malo Afaatasi lale e faulai ai Ekalesia ua fia afe ma afe ma afe tausaga, e matua atu nai lo le Ekalesia kerisiano. Lau Afioga i le Fofoga Fetalai, e le taumate o se manatu faapena, a o le faasaoga o mafaufauga lea na tautino mai lava e

le Faamasino Sili, ma ia faapea ai foi i isi ana molimau mulimuli, ou te sainia faaiuga e faavae i le Faavae o le Malo o Samoa lea e misi ai le pulega mamalu a alii ma faipule ma le maligi o ou loimata. Aisea? Ona e le o amanaia pulega mamalu a lou atunuu.

Lau Afioga i le Fofoga Fetalai, e le mama upu ia, aemaise e mai le fofoga o le Faamasino Sili talu ai. O le ala lena lea na aumai ai loa e le Malo le mataupu i luga o le fautuaga, le tuualalo i le Fono lena a le Maota lenei, lea na amata mai i le lafo, ina ia tatou faia se Komiti Suesue e amata faatalanoa ai le tulaga e ao ai ona ave le fesoasoani a le Maota ma le Malo i lea lala o le Malo, tele le faaletonu la e i ai, faaletonu i le a? Faulai apili, aemaise lava le tulaga o Fanua ma Suafa, faapea foi ma le Faamasinoga o Soligatulafono. O le ala lena na ala ai ona faia le tatou iuga lena, na tofi ai le tatou Komiti ma amata faatalanoa loa le anoano o le mau fautuaga. Na valaau ai le atunuu atoa. E le o malamalama i ai le toatele i tua atu o le Maota lenei. O le a la le mea na tupu? Ona aumai lea o le Lipoti a le Komiti lea e alaala mai sui o le tou Komiti, le Komiti lea e suesuea mea ia ma faia ai loa, pasia loa e le Palemene o le a fai le suesuega. Uma le suesuega na valaau ai le atunuu atoa, tumutumu mai ai ma aumai o latou finagalo, ona aumai ai lea o le Lipoti lena ma fai ai loa le faaiuga e lagolago ma faatonu ai loa Tulafono ia tusia ma aumai i totonu o le Maota ua uma ona pasia e le Paeaiga lenei, e aumai i totonu o le fatu o le Faavae, Faavae i le Atua Samoa, pasi. Ae toe la o le mea lea ona e i ai mafuaaga, ua tuai ai ona aumai e le Loia Sili ona e tele a latou tapenaga e tataua ona fai, faapea foi ma le Komisi o Tulafono Toefuataiga, na latou vaavaai ai i mea o lo o fai foi e isi atunuu ona fau ai loa lea o le Tulafono pei ona taoto i totonu o le Palemene. A faitau la i ai i le manatu faapea ua faatopelau, e le i faatopelauina. E mafai ona ou faapea atu, o le amataga o le Paeaiga lenei na faufau mai ai, a o lea faatoa oo mai i le faaiuga lenei o le Paeaiga. O lea ua faaiu le galuega a le Paeaiga lenei ma ou te tau atu, o le isi lenei Paeaiga e ogaoga a latou galuega. Ou te momoli atu le faamalo. E ogaoga mea ua outou faia, fai ma le le fefe, le anoano o le mau tetee ua aumai nei, a o lea ua ou vaai atu, ua pei ua tau alu atu ai ma isi, e pei ua galo ia latou, o le Tulafono lenei o le Tulafono a le Maota lenei o le Palemene, o le Tulafono a le Maota o le Palemene.

Afai la i se faitauga ma se faauigaina e se tasi e le o mafai e se vaega o Tulafono Tau Faaofi nei ona maua le agaga tonu po o le faamoemoe autu o lena Tulafono Tau Faaofi ina ia atagia mai ai Samoa, Samoa o le tatou atunuu pele i lana Tulafono Faavae. E faapefea ona e fesoasoani e ala i sau faasoa i sou sao i le Tulafono ina ia maua ma faamautu atili ai le manulauti po o le faamoemoe aoao o nei Tulafono Tau Faaofi i totonu o nei Tulafono Tau Faaofi? O le luitau lea i le vasega o Faamasino ma Sosaiete a Loia ma i latou uma e le o fia malamalama. E tele loia ua tuuina mai a latou fesoasoani i le agaga lava lea ua masani ai latou o loia e loto atunuu, malamalama i le atunuu, malamalama i a latou measina, e loloto le latou faatofalaiga i le uiga

tonu o Tulafono o tau faaofiofi. E moomia ai le sao mo le faaleleia atili o a latou tuualalo leleoa, e le faaleoa foi o latou igoa i le agaga e le fia tagata iloa, ae o le tautua e aumai i le loto faamaoni. E le fia tutu mai luma o le TV ma nusipepa ma o latou igoa, e ese ai ma loia ua faaali finagalo i fafo atu o le agaga moni o nei Tulafono Tau Faaofi. A sese loa la le tulaga po o le **stand point** po o le **perspective** e te tu ai i le amataga o lau faitauga o nei Tulafono Tau Faaofi, o le fesili; po ua e faitau ma faauiga ea Tulafono Tau Faaofi i fafo atu o le faamoemoe sili ia atagia Samoa i lana Tulafono Faavae? O le fesili lena. Ona ese loa lea o le tulaga ua e faaali finagalo mai ai, ua e i fafo atu o le faamoemoe o Tulafono Tau Faaofi ia e tolu po o se isi lava Tulafono o lo o tau faaofiofi.

Faafetai ia i latou ua faigofie ona latou faitau ma maua vave le agaga moni o nei Tulafono o lo o tau faaofiofi, aua foi e vave tele le tuu mai o le latou faasoa ma manino lelei ai o latou finagalo, ua fiafia e aumai lo latou sao e faaleleia atili ai Tulafono Tau Faaofi. Aisea? O le avanoa lea mo se sao taua e tuu i ai Samoa pe tuu i ai ni mataupu, **Articles of the Constitution** e amanaia atili ai au lava tu ma lau aganuu lea e te tiu ai ma o tatou sapi ai i totonu o le Tulafono Faavae e ala atu i le Faamasinoga o Fanua ma Suafa. O le faasoa la lenei lau Afioga i le Fofoga Fetalai ma le mamalu o le Maota, e aoga tele mo le faufau ma toe saga faufau atili ma le faaleleia atili o tatou Tulafono Tau Faaofi mo le pasia faaii e le Palemene lenei o Samoa. O le fesoasoani ia i latou o faia faasalalaua i le loloto o le eseese o le Tulafono o lo o tau faaofiofi ma le Tulafono ua pasia e le Palemene, ma ua faia foi le faitauga faatolu, aua foi e le malamalama latou o faia ia polokalame i le agaga tonu o Tulafono Tau Faaofi ona faasaga ese loa lea o finagalo faaalua i Tulafono Tau Faaofi. E taua le fesili; o le a sou silafia. O le a le agaga tonu o nei Tulafono Tau Faaofi? Afai e sao lau tali, o le atagia atili ai lea o Samoa i totonu o lana Tulafono Faavae, ona amata sao ai lea o nei faatalanoaga o fai nei ma e ono maua ai se fesoasoani mo tatou Tulafono Tau Faaofi ma le agaga lelei, e manaomia ni manatu e atili toe faufau ai le Tulafono ae le o le tufue lava fana i le tu'itu'i le Tulafono o lea e pepe si mea e le i matua.

O nisi o finagalo i fafo atu o le manulauti po o le faamoemoe o Tulafono Tau Faaofi, ua matua mamao, mamao, mamao ese lava ma Tulafono Tau Faaofi. E fiu e tau faavasega pe faapefea ona fesootea ma fesoasoani ia maua le aua ma le faamoemoe na faataatia mai ai ni manatu e lelei, e faaleleia atili ai le mea o tau faaofi. E pau lava le tali lea e maua e latou o matua tetee, tetee, pogisa le mafaufau, taofi na mea, aua le faia, taofi aua le faia. E leai se fesoasoani, na o le pau lava le mea, faaauau pea faaletonu o lo o i ai nei, ma agai atu lava le faaletonu i tatou tu ma tatou agaifanua i pulega mamalu a alii ma faipule.

Lau Afioga i le Fofoga Fetalai, o le mea lea ua mautinoa, o tatou Tulafono Tau Faaofi, e le tamauina, e le tamauina. O lo o avanoa pea le Komiti Faapitoa faa-Palemene, e aumai i ai sou sao taua e poupu atili ai tatou

Tulafono Tau Faaofi, ma faamalamalama atili atu ai faamoemoega uma o a tatou Tulafono ia Faaofi e 3. O le fale o Samoa e fau tele, o si mea mai i ma si mea mai o, ona maua ai lea o le atoaga o tatou Tulafono Tau Faaofi i le soalaupulega o fai nei, e faatatau i le Faamasinoga o Fanua ma Suafa.

Lau Afioga i le Fofoga Fetalai, o si au agiagi lena e faaiu ai le tatou Fonotaga, e faamoemoe e toe usuia i le aso ua atofa, ma ou te tatalo aumai loa lau fesili.

FOFOGA FETALAI: Malo faafetai. Ia, ua faafofoga le Palemene aemaise foi o le tapuai mai a le atunuu, aua le tatou Fonotaga lena. Ua malele foi ma saunoa foi le Minisita o Tupe, ua tatou faalogo i se tala manaia ma le matagofie ua faapena ona faasafua ai i le atunuu. I le silasila a le Malo ina ia faapena ona o tatou taufai maua le fesoasoani ona o lo o feagai i tatou ma aafiaga o lena faamai. Ia, ua faapena foi ona faafofoga i le matagofie o le Tala o le Tupe e fuafua i atinae eseese a le Malo ina ia faapena ona faataunuuna. O lea la ua fono faapipii foi le saunoaga a le Taitai o le Malo aua nisi itu taua e faapupula ma fautua ai foi e le gata i sui usufono mamalu o le Palemene ae faapea foi le faafofoga tapuai mai a Samoa. Ua le o toe faigofie lena vaitau, o loto lava ma manatu, ae o si o ta lima lava e paia ai lota mata, e faapena ona tatou maua... a manino lava ma malamalamalama se mea, e le mafai ona tatou nofoai i o tatou tiute ua valaauina ai i tatou e ao ona faatino. E faatino tiute o Taitai o le Malo e atinae Samoa, i le tulaga o lo o faapena ona alalaga ai foi le atunuu, ua sui Samoa i le tulaga sa i ai i aso ua mavae. E leai se isi e le mafai ona le molimauina ma le loto fiafia lea tulaga.

Ae ui i lea o lea ua faaiu le saunoaga a le Palemia ua faatu le lafo, ina ia tolopo le Tualumaga o le Fono Aoaofa Faitulafono seia aulia le Aso Lua, o le aso 16 lea o Iuni. Se i faaluaina mai le lafo e pei ona saunoa le Palemia.

Faaluaina e le Minisita mo Pisinisi, Alamanuia ma Leipa ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo.

FOFOGA FETALAI: E tusa ai ma Tulafono Tumau 132 o le a tolopo felafolafoaiga i le Tulafono Tau Faaofi o le Faatatauina o Tupe 2020/2021 e le itiiti ifo i le 14 aso, a o tuuina atu le Tala Faatatau Autu o le Tupe 2020/2021 mo le iloiloga a le Komiti o Tupe Maua ma Tupe totogi ma toe lipoti mai i le Fono Aoaofa Faitulafono.

ISI FAASILASILAGA A LE FOFOGA FETALAI

FOFOGA FETALAI: O lo o i ai le faasilasilaga taua mo le Palemene, ia o tulaga masani ma le auaunaga e faapena ona mulimulitaia. E manaomia le mulimulitai ai ma malamalama, e le gata i le Palemene a o le aoatetele o le atunuu. E ui ina tatou i ai i le vaitau o puipuiga o le faamai o le Koviti-19, ae le o mafai ona tuuaunoaina ai polokalame talafeagai ua maea ona fuafuaina mo le malupuipua o le soifua saogalemu o sui usufono mamalu o le Palemene. O fuafuaga foi ia o lo o faataua e nisi o itutino galulue o le Malo, e tusa o a latou matafaioi tauave ia mautinoa le saogalemu o le atunuu i taimi o faalavelave tutupu faafuasei. E i ai le talitonuga e le faigofie le faafuaseia o le Maota pe a tulai mai se faalavelave faafuasei e pei o se mu, pe afai e leai se tapenaga e taiala ai tatou uma i le taimi e tulai mai ai se faalavelave faafuasei.

O lea ou te faasilasila atu ai ma le agaga faaaloalo mo le silafia e le Palemene e faapea, o le maea ai o le tatou Fonotaga i le aso o le a faatino ai i totonu o le tatou Maota Fono lenei, se polokalame faataitai o le tulai mai o se mu, a o tauaofia le Palemene i ana Fonotaga masani tai pei o le Fonotaga i le aso.

Lua, o lenei faataitaiga o le a galulue faatasi ai; 1. O le Ofisa o le Fono Aoao. 2. Auaunaga o Faalavelave Tutupu Faafuasei ma le Tinei Mu. 3. Faalapotopotoga o le Malosi Faaeletise, Pulega a le EPC. 4. Faalapotopotoga a le Koluse Mumu, 5. Pulega o le Suavai, 6. Isi auaunaga e fesootai i taimi o faalavelave e tutupu faafuasei.

Ou te talosaga atu ai ma le faaaloalo i le paia ma le mamalu o lenei Palemene, a maea le tatalo e faaiu ai le tatou Fonotaga, faamolemole, talimau ma afiio mai pea i outou nofoaga. E ui ua na o se faataitaiga ae manaomia le tatou galulue faatasi, aua tatou te le iloa le mea e ono tupu taeao ma le lumanai. A maea ona tolopo aloaia le tatou Fonotaga ona momoli aloaia lea o le Faailoga o le Pule, le Mace e pei ona silafia e le satini o le Maota i le potu i tua e tuu ai le Faailoga o le Pule e tusa o tulaga mamalu o le Palemene. O le a faaola mai e le tatou Ofisa le faailoilo, le alarm, mo faalavelave tutupu faafuasei ona limataitaina lea o tatou uma i le faatonuga o lo o aumai faatasi e le alarm. O le a i ai alii ma tamaitai ofisa ua maea aoaoina e le Auaunaga o Faalavelave Tutupu Faafuasei ma Tineimu le faatonuga mo lo tatou ulufafo mai le Maota nei. E manaomia lo tatou amanaia o faatonuga uma o le a tuuina mai e le tatou Ofisa mo le sologa lelei o le faamoemoe i le aso faamolemole.

O le faataitaiga i le aso o le a faatulaga e faapea, o le mu ua tulai mai i totonu o le potu lea e i autafa o le faitotoa o lo o i tua atu o le Afioga i le Palemia e faapea le mamalu o le Kapeneta, o le faitotoa lea e i lou itu taumatau, o le itu lea e pei ona silafia. O lona uiga e leai se isi e toe faaaogaina le faitotoa lea mo le ulufafo. E na o le 2 faitotoa o le a faaaogaina

mo le saogalemu. O le faitotoa i le itu i sisifo i lou itu tauagavale, e na o i latou o le a ou faailoaina o latou suafa mo le ulufafo. O lona uiga o le itu lea, o latou la ia o sui usufono e toa 4 i le pito mai i luma, i le amata atu i le Afioga ia Aeau, 2. O sui usufono e toa 4, e amata atu i le Sui Fofoga Fetalai, sui usufono e toa 4 i le nofoaga i luga, e amata atu i le tofa a Namulauulu, o isi sui usufono o Ofisa Sili o Pulega o Matagaluega, o le a ulufafo atu i le faitotoa atu i luma, o lo o feagai ma le tatou Maota nei. I taimi o faalavelave tutupu faafuasei, e manaomia le usitaia o faatonuga uma o le a tuuina mai e le Ofisa ua lautogia mo le saogalemu. O le a faailoa atu foi e alii ma taimaitai ofisa le vaega tatou te potopoto uma i ai, pe a tatou ulufafo uma mai le Moata nei. Ia manatua lelei o le taimi o faalavelave tutupu faafuasei, ia faataua lou soifua, ia ave lau faamuamua i lou soifua ona faatoa saili ai lea o au meatotino.

E toe tatalo atu faamolemole, tatou galulue faatasi. Mo le silafia a maea le tatou faataitaiga ona agai sao atu lea i le Maota o Tofilau Eti Alesana o le tatou Ofisa, o i ina o le a tali ai le sua mo le faasiligamalosi. E ui ina faaumiumi, ae ou te manatu mo le saogalemu o le soifua maloloina, e le gata i le Kapeneta ma le Palemia a o le Palemene, aemaise foi o outou o aao taumatau o le Malo, o outou o Ofisa Sili o Pulega o Matagaluega ma Faalapotopotoga a le Malo.

O le faaaliga lea ma le agaga faaaloalo. O le a ou faaiuina le tatou Fonotaga i se tatalo.

Na tolopo Taulumaga a le Fono Aoaofa Faitulafono i le itula e 11.42 i le taeao seia aulia le itula e 9:00 i le taeao, Aso Lua, 16 Me 2020.